

فريق التفريغ بموقع الطريق إلى الله  
يقدم

## اليوم السادس عشر من "سلسلة الطريق إلى القرآن"

(باللهجة المصرية)

فضيلة الشيخ : الدكتور / حازم شومان



رابط المادة : <http://www.way2allah.com/modules.php?name=Khotab&op=Details&khid=120>

السلام عليكم ورحمة الله وبركاته ، الحمد لله وكفى وصلاة وسلاماً على عباده الذين اصطفى ، ثم أما بعد ،  
النهاردة ياذن الله سبحانه و تعالى يا جماعة معانا سورة مريم وسورة طه ، و السورتين أخطر من بعض ، ومواضيعهم  
بالنسبة لنا أهم من بعض.

### شوط التربية

إحنا دلوقتي في الشوط الذي من سورة الكهف لسورة الفرقان ، الشوط اللي مقصده تربية المؤمنين ، الشوط ده يا  
جماعة شوط تربية ، ربنا يربينا ، يعني الشوط ده مش السميت الغالب عليه زي اللي قبله الدعوة و طلبات الدعوة ،  
لا ، السميت الغالب عليه أنك لازم تتربي ، أنك لازم تخرج من الشوط ده بصفات لو خرجت منه بها ، هتبقى لو  
خرجت بعد كده للدعوة هتبقى داعية تقلب دولة كاملة ، أو تقلب العالم كله.

كل سورة من سور هذا الشوط تزرع فينا صفة أو صفتين ، الصفات دي أركان في بناء شخصية الداعية.  
تكلما امبارح في سورة الكهف ، و قلنا أن سورة الكهف تبني فيك صفة الحركية و لكن بانضباط ، و أنك لازم  
تبقى واقف على ثغر ، تسد ثغر من ثغور الدين ، و الفهم الشمولي للدين ، سندخل في سورة مريم ، الربانية و  
اليقين الهائل بالله و الثقة المطلقة في قدرة الله سبحانه و تعالى ، لأنك و أنت داعية سيقابلك ابتلاءات ، لو ما عندكش  
ثقة أن ربنا يقدر يحميك و يقدر يفرج كربك مش هتقدر تواصل.

### سورة طه

سندخل في سورة طه التي تكلمك عن إيه؟ طه موضوعها في غاية الخطورة بالنسبة لنا جميعاً ، طه تكلمك عن نموذج  
، ربنا عرضلك طول السورة نموذج وهو سيدنا موسى ، نموذج مبهر في الإيمان و في القلب ، و في التربية القلبية ،  
و مبهر في الدعوة و في صفات الدعوة. ربنا عرض لك النموذج ده، و بعد كدة يقولك إيه ؟ خد بالك  
النموذجدما طلعتش إلا بعد تربية ، النموذجدما طلعتش غير بعد ما ربينته ، يعني ربنا يشرح لك في السورة كيف  
ربنا ربي موسى ، كأن سورة طه تقول لك التربية خطيرة أد إيه ، بتقولك خطورة التربية أد إيه ، بتقولك أنت الأول  
، اهتم بنفسك الأول ، ابن نفسك الأول ، اسع بقدر إمكانك أنك أنت تتبني و تتربي الأول ، لأنك لو اتبنيت و  
تربيت ، بعد كدة لما ستخرج للعالم ك داعية ، ستقلب الدنيا كلها ياذن الله.

### أنت أولاً

ربنا بيقلنا يا جماعة كيف ربي الله موسى على معرفة الله ، وكيف رباه على البطولة في الدعوة ، و من خلال الكلام  
ده هنوصل إحنا لإيه؟ خطورة التربية و احنا محتاجين للتربية أد إيه ، و هنوصل في الآخر إلى كيف تصل إلى الله ، ما  
أنا عاوز أترى أنا كمان على معرفة الله عشان أبقى بطل. السورة بتقلبك سبع أبواب بيوصلوك لمعرفة الله سبحانه و  
تعالى ، عشان تعرف الله سبحانه و تعالى حق المعرفة فتبقى بطل ، السورة بتقولك إيه ؟ عشان نفتكر تاني ، أنت

الأول ، حتى من أولها ربنا يكلم سيدنا موسى يقول له **"إِنِّي أَنَا اللَّهُ لَا إِلَهَ إِلَّا أَنَا فَاعْبُدْنِي وَأَقِمِ الصَّلَاةَ لِذِكْرِي"** طه: ١٤ الصلاة هنا مع سيدنا موسى ذكرت في الأول خالص ، بعد سنين في آخر سورة يونس هنالقي الصلاة ذكرت مرة ثانية مع بني إسرائيل **"وَأَوْحَيْنَا إِلَىٰ مُوسَىٰ وَأَخِيهِ أَنْ تَبَوَّأَ لِقَوْمِكُمَا بِمِصْرَ بَيْوتًا وَاجْعَلُوا بُيُوتَكُمْ قِبْلَةً وَأَقِيمُوا الصَّلَاةَ وَبَشِّرِ الْمُؤْمِنِينَ"** يونس: ٨٧

يا رب أنت كلمت موسى عن الصلاة من قبل ما تذكر سيرة الصلاة مع بني إسرائيل بسنين طويلة ، ليه يا رب؟ يا رب أنت كلمت موسى عن الصلاة قبلها بسنين طويلة ليه؟ كأن ربنا بيقلك مش أنت اللي هتبقى داعية؟ أنت الأول اللي لازم تتبنى ، أنت أكثر واحد لازم تطبق اللي أنت بتكلم الناس فيه ، وأول واحد لازم تطبق اللي أنت بتكلم الناس فيه ، ولازم لو في واحد من اللي قاعدين قدامك، أو بيدعوا على إيديك ، أو بيتربوا على إيديك ، لو في واحد منهم مجتهد في العبادة ، لازم أنت تبقى أولى منه بهذا من قبلها بسنين ، يعني إيه يا جماعة؟ يعني كأن ربنا يقول لسيدنا موسى أنت الأول

بل كأن الله يقول لسيدنا محمد صلى الله عليه وسلم في آخر السورة أنت الأول ، لما ربنا ذكر أحوال الآخرة **"وَنَحْشُرُ الْمُجْرِمِينَ يَوْمَئِذٍ زُرْقًا"** طه: ١٠٢ و ذكر الجبال و هي تنسف نسفاً **"فَيَذَرُهَا قَاعًا صَفْصَفًا \* لَا تَرَىٰ فِيهَا عِوَجًا وَلَا أَمْتًا"** طه ١٠٦ : ١٠٧ أهوال رهيبة تحصل يوم القيامة ، والفرع اللي الناس بتبقى فيه يوم القيامة ، طبيعي أن الرسول صلى الله عليه وسلم و هو خايف على الناس أول ما يسمع الكلام ده يقول إيه؟ لا ، أنا عاوز أروح أكلم الناس عن الآخرة ، عشان الناس يخافوا منها ، فرينا يقول له **"فَتَعَالَىٰ اللَّهُ الْمَلِكُ الْحَقُّ وَلَا تَعْجَلْ بِالْقُرْآنِ"** طه: ١١٤ استنى ، أوعى تقعد تكرر ، أوعى تقعد تحفظ ، إمال إيه يا رب؟ سيبه يتزل على قلبك أنت الأول ، سيب المعاني دي تتزل على قلبك أنت الأول ، ليه يا رب؟ أنت الأول ، أنت اللي لازم تتربي الأول ، أنت اللي لازم تتبنى الأول

ونفس المعنى مكرر في سورة القيامة لما ربنا كلم الرسول صلى الله عليه وسلم **"فَإِذَا بَرِقَ الْبَصَرُ \* وَخَسَفَ الْقَمَرُ \* وَجُمِعَ الشَّمْسُ وَالْقَمَرُ \* يَقُولُ الْإِنْسَانُ يَوْمَئِذٍ أَيْنَ الْمَفْرُ \* الْقِيَامَةُ ٧ : ١٠** ما هو النبي صلى الله عليه وسلم هيسمع الكلام ده هيتربع علينا ، أما أخرج أكلمهم ، أما أخرج أكلم الناس ، ماضيعش لحظة ، استنى **"لَا تُحْرِكْ بِهِ لِسَانَكَ لِتَعْجَلَ بِهِ \* إِنَّ عَلَيْنَا جَمْعَهُ وَقُرْآنَهُ"** القيامة ١٦ : ١٧ ليه ربنا بعد أهوال الآخرة في طه و في القيامة قال للنبي صلى الله عليه وسلم **"لَا تُحْرِكْ بِهِ لِسَانَكَ لِتَعْجَلَ بِهِ"** ما تقعدش تكرر وراء جبريل ، سيب الكلام يتزل على قلبك ، سيب معاني القرآن يشربها قلبك ، عيش في قيام الليل مع القرآن

عيشوا يا جماعة مع القرآن الأول ، عيشوا مع التربية الأول ، السورة دي بتقلك أنت الأول ، **لو أنت اتبنيت صح ، لو خرجت بعد كدة و الدعوة دي كانت جبل هتشيله** ، لو أنت اتبنيت صح هتخرج بعد كدة في أرض الدعوة هتبقى جبل يثبت أرض الدعوة ضد أي زلزال ، إنما لو خرجت للدعوة و أنت هش ، أنا أتكلم عن الدعوة الاحترافية ، مش دعوة اثنين ثلاثة من أصحابك ... لا... الدعوة الاحترافية ، إنما تخرج للدعوة و أنت لسه هش ، هتقع بأسرع مما تتصور ، سورة طه تكلمنا يا جماعة كيف ربي الله موسى.

**الله أكبر**

"طه" طه: ١ ده مش اسم من أسماء رسول الله صلى الله عليه وسلم ، هذا حروف مقطعة ، زي اللي احنا اتكلمنا عنها قبل كدة ، اللي من أهم مقاصدها هو الثقة في الله ، ما أنت تقول الحروف دي و أنت مش عارف معناها ، بس أقولها ثقة فيك يا رب ، أنك أنت ما بتقلش حاجة إلا و لها حكمة ، فمن أولها الثقة في الله ، لازم يبقى عندك ثقة في الله .

"مَا أَنْزَلْنَا عَلَيْكَ الْقُرْآنَ لِتَشْقَى" طه: ٢ انت تعبان ليه؟ انت زعلان ليه؟ انت مرهق ليه؟ ده ربنا كبير ، من أولها ربنا بيتكلم سبحانه و تعالى عن نفسه ، أنا بحس أن كأن ربنا يقول للنبي صلى الله عليه وسلم كدة ، ده ربنا كبير ، أنت إيه اللي مزعلك؟ و إيه اللي تعبك؟ و إيه اللي مضايقتك؟ و إيه اللي محزنك؟ "مَا أَنْزَلْنَا عَلَيْكَ الْقُرْآنَ لِتَشْقَى" \* إِلَّا تَذَكْرَةٌ لِّمَن يَخْشَى \* تَتْرِيلاً مِّمَّنْ خَلَقَ الْأَرْضَ وَالسَّمَاوَاتِ الْعُلَى" طه: ٢: ٤ افكر قدرته "الرَّحْمَنُ عَلَى الْعَرْشِ اسْتَوَى \* لَهُ مَا فِي السَّمَاوَاتِ وَمَا فِي الْأَرْضِ وَمَا بَيْنَهُمَا وَمَا تَحْتَ الثَّرَى" طه: ٥: ٦ افكر ملكه "وَإِنْ تَجَهَّرَ بِالْقَوْلِ فَإِنَّهُ يَعْلَمُ السِّرَّ وَأَخْفَى" طه: ٧ افكر علمه ، افكر صفات الملك عشان تعرف أن ربنا كبير ، و تعرف إيه اللي زعلك لما ربنا العظيم سبحانه و تعالى بكل علمه و قدرته معك ، إيه اللي يقلقك؟ و إيه اللي يزعلك؟ و إيه اللي يخوفك؟ يبقى من مقدمة السورة ربنا يقول لك ، ربنا كبير ، يبقى أوعى تخاف و أوعى تزعل و أوعى تتعب و أوعى ترهق.

**قصة سيدنا موسى**

ثم نبدأ في قصة سيدنا موسى وهي عبارة عن ثلاث أشواط

**الشوط الأول:** موسى و كلام الله ، موقف طويل ، سيدنا موسى يكلم الله ، نسأل الله تعالى أن يرزقنا أن نكلمه في الآخرة و ننظر إلى وجهه الكريم ، اللهم آمين يا رب ، و سيدنا موسى يكلم ربنا شوط طويل ، كيف ربي الله موسى إيمانياً ، ده أول حاجة التربية الإيمانية.

**الشوط الثاني:** كيف ربي الله موسى بالدعوة و كيف رباه بالتكاليف ، روح لفرعون ، موسى و فرعون ، و موسى و الصحراء ، و موسى و شق البحر ، ثلاث مواقف في الشوط الثاني ، إزاي رباه للدعوة إلى الله .

**الشوط الثالث:** لما سيدنا موسى رجع لقومه بعد ما عبدوا العجل ، و ظهر أد إيه إيمانيات موسى و أد إيه جهد موسى ، و أد إيه فهم موسى ، يبقى الشوط الثالث المقامات اللي وصل ليها سيدنا موسى بسبب هذه التربية ، عشان تعرف التربية ، لو أنت مشيت في السكة دي هتوصل لإيه ، عشان لو أنت بتتربي شوف نتيجة تربيتك إيه. **الأول التربية الإيمانية ، الثاني هتخرج للدعوة و تتربي أكثر ، الثالث هتوصل لمقامات ما كنتش تحلم بها في حياتك ،** و لو أنت رجل مربي أو تتابع ناس في الدعوة لو عاوز تربيهم ، تربيهم كدة الأول تربية إيمانية ، و بعد كدة تبدأ تشغلهم في الدعوة فيتربوا أكثر و ينضجوا أكثر ، بعد كدة بص للمقامات اللي هتطلع منهم هتنبهر إزاي طلعت؟ ما دي تربية القرآن يا جماعة.

## الشوط الأول من قصة موسى

"وَهَلْ أَتَاكَ حَدِيثُ مُوسَى \* إِذْ رَأَى نَارًا فَقَالَ لِأَهْلِهِ امْكُثُوا إِنِّي آنَسْتُ نَارًا " طه: ١٠٩ سيدنا موسى خارج من مدين بعد ١٠ سنين ، و ماشي فعاوز نار "إِنِّي آنَسْتُ نَارًا لَعَلِّي آتِيكُمْ مِنْهَا بِقَبَسٍ أَوْ أَجْدٍ عَلَى النَّارِ هُدًى" طه: ١٠ سيدنا موسى رايح يطلب جذوة نار يضيء بها ليه ولزوجته ، فرجع بجذوة نور يضيء بها للعالم كله ، كان رايح يطلب شوية نار ، لقي نور السموات والأرض سبحانه وتعالى ، اللحظة اللي أستعمل فيها سيدنا موسى ، كأن ربنا يقولك ما تعرفش أنت هتستعمل إمتي ، ممكن في أي لحظة تُستعمل ، سيدنا موسى في المواقف اللي قبل كدة في حياته اللي القرآن بيعرضها ، تبين لك سيدنا موسى كان يجاهد في التربية القلبية أد إيه ، و كان منطلق إلى الله أد إيه ، لما وصل ربنا استعمله .

## لا تشغل نفسك بالاستعمال

ما تشغلش نفسك في الاستعمال ، ما تعرفش ربنا هستعملك فين ، و لا ربنا هستعملك في إيه ، و لا ربنا هيقفك على أي ثغر من الدين ، اشغل نفسك أنك تتبني ، و ساعة ما تتبني ربنا هستعملك ، ربنا استعمل سيدنا موسى ، و سيدنا موسى لو كنت تسأله قبلها أنت تقدر تشيل مسؤولية خمسة في الدعوة ، يقولك أنا ما قدرش أشيل مسؤولية واحد ، و هو جبل ، بس ما يعرفش أن هو جبل ، و ربنا لما استعمله طلع جبل ، فأنت اجتهد في التربية القلبية ، و لما هتتملي من جوة ، لما الإناء - قلبك - يتملي هيبقى يخرج لبرة ، هيبقى يفيض ، ربنا ساعتها هستعملك في مقامات في الدعوة ما كنتش تتوقعها من قبل .

"إِنِّي آنَسْتُ نَارًا لَعَلِّي آتِيكُمْ مِنْهَا بِقَبَسٍ أَوْ أَجْدٍ عَلَى النَّارِ هُدًى \* فَلَمَّا آتَاهَا نُودِيَ" طه: ١٠ : ١١ الله أكبر ، هناك من ينادون الله وهناك من يناديهم الله "نُودِيَ يَا مُوسَى" طه: ١١ موسى؟ مين اللي عارف اسمي في الحنة دي؟ أنا ما فيش حد يعرفني هنا "إِنِّي أَنَا رَبُّكَ" طه: ١٢ ربنا اللي ينادي موسى ، تخيل أول كلمة ربنا قالها لموسى "يَا مُوسَى" يناديه باسمه عشان يرقق قلبه ، ده لو رئيس جمهورية قالك يا محمد و أنت اسمك محمد قلبك هيقوع ، فما بالك أن الملك يقول "يَا مُوسَى \* إِنِّي أَنَا رَبُّكَ" طه: ١١ : ١٢ سبحان ري اعرف الله بالربوبية

أول حاجة لازم تتعرف عليها مع الله إنك تعرف يعني إيه ري ، تعرف نعم ربنا "إِنِّي أَنَا رَبُّكَ" كل نعم حياتك أنا اللي عاملها لك ، كل مشاكل حياتك أنا اللي حليتها لك ، كل ما ترفع يدك أنا اللي أنزل لك إجابة الدعاء "إِنِّي أَنَا رَبُّكَ" خدوا بالكم يا جماعة "إِنِّي أَنَا رَبُّكَ فَاخْلَعْ نَعْلَيْكَ إِنَّكَ بِالْوَادِ الْمُقَدَّسِ طُوًى" طه: ١٢ بعدها ربنا يقوله "إِنِّي أَنَا اللَّهُ" طه: ١٤ يبقى ربك قبل الله ، إنك تعرف ربنا بالربوبية و النعم قبل ما تعرف ربنا بالعظمة ، تعرف ربوبية الله قبل ما تعرف الله بالتكاليف ، اعرف ربنا بالربوبية الأول ، أول حاجة لازم قلبك يتربي عليها نعم الله ، لازم تجيب ورقة و قلم و تكتب ورقة النعم ، و تقعد تعد نعم ربنا عليك ، و كل شوية تزود نعم أكثر لما تفتكر نعم أكثر ، و الورقة دي كل يوم تبص فيها و تقعد تقول يا رب لك الحمد و الشكر يا رب ، من أعظم أبواب معرفة الله .

## تكريم الله لموسى

"إِنِّي أَنَا رَبُّكَ فَاحْلَعْ نَعْلَيْكَ إِنَّكَ بِالْوَادِ الْمُقَدَّسِ طُوًى \* وَأَنَا اخْتَرْتُكَ" طه: ١٢: ١٣ الله أكبر ، شافيين التكريم يا جماعة ؟ "وَأَنَا اخْتَرْتُكَ" ده لو محافظ قالمها لي أنا .. سبحان الله ، تخيلوا ربنا يقول لواحد "وَأَنَا اخْتَرْتُكَ" يعني مش محافظ و لا رئيس جمهورية يقول لواحد أنا اخترتك للوظيفة دي ، ربنا اللي بيقول "وَأَنَا اخْتَرْتُكَ" هيقع عليك اختيار الله ، خدوا بالكم يا جماعة ، في وظائف كثير جدا فاضية الأيام دي ، في بناء الدين و في مؤسسة الدين ، فيه أماكن و فيه ثغور كثير جدا مفتوحة ، في أماكن كثير جدا محتاجة دعوة و مفيش دعاة يبسدوها ، في علم كثير جدا ناقص ، خدوا بالكم يا جماعة ، كل دي وظائف غالية ، عشان ربنا يختارك لازم تحقق اللي حققه سيدنا موسى "وَأَنَا اخْتَرْتُكَ" طه: ١٣ "وَاصْطَنَعْتُكَ لِنَفْسِي" طه: ٤١ "وَلِصْنَعِ عَلَى عَيْنِي" طه: ٣٩ يا موسى ، يا موسى ، يا موسى ، إيه التكريم ده كله يا رب؟! لازم تعيش في الجو ده أول تربيتك ، جو نعم ربنا و إكرام ربنا و عظمة ربنا

## أهمية العبادة

"إِنِّي أَنَا اللَّهُ لَا إِلَهَ إِلَّا أَنَا فَاعْبُدْنِي وَأَقِمِ الصَّلَاةَ لِذِكْرِي" طه: ١٤ العبادة ، لازم تعيش فترة في العبادة ، لازم تتربي الأول على معاني العبادة "وَأَقِمِ الصَّلَاةَ لِذِكْرِي" خدوا بالكم احنا بنصلي صلاة المنافقين يا جماعة اللي هما "وَلَا يَذْكُرُونَ اللَّهَ إِلَّا قَلِيلًا" النساء: ١٤٢ أنا عايزك تسبح و أنت في قيام الليل ثلاثين مرة في الركوع ، و خمسين مرة في السجود الأول ، و مائة مرة في السجود الثاني ، أنا عايزك تعيش مع التسبيح ، أنا عايزك تملأ الصلاة ذكر لله ، أنا عايز يا جماعة معاني التسبيح و الذكر في الصلاة تنزل على قلوبنا ، الصلاة دي معمولة عشان تمتلي ذكر ، و أنت واقف بين أيدي ربنا يجي في قلبك عظمة ربنا "وَأَقِمِ الصَّلَاةَ لِذِكْرِي" يعني اعبد العبادة اللي أنت فاهم معانيها الإيمانية ، اعبد ربنا بفن ، اعبد ربنا و أنت عارف أسرار العبادة ، و المعاني الدقيقة اللي في حركات و أفعال العبادة عشان العبادة تجيب أثر

## حب الله

"إِنَّ السَّاعَةَ آتِيَةٌ أَكَادُ أَخْفِيهَا لِتُجْزَى كُلُّ نَفْسٍ بِمَا تَسْعَى" طه: ١٥ "وَمَا تِلْكَ بِيَمِينِكَ يَا مُوسَى" طه: ١٧ "قَالَ هِيَ عَصَايَ" طه: ١٨ دي العصاية بتاعتي "قَالَ أَلْقِهَا يَا مُوسَى" طه: ١٩ خدوا بالكم يا جماعة لما ربنا قال له "وَمَا تِلْكَ بِيَمِينِكَ" قال له إيه؟ "قَالَ هِيَ عَصَايَ أَتَوَكَّأُ عَلَيْهَا وَأَهُشُّ بِهَا عَلَى غَنَمِي وَلِيَ فِيهَا مَآرِبُ أُخْرَى" طه: ١٨ قاعد يطول في الكلام ليه؟ ده من حب الله يا جماعة ، مقام الأنس ، الأنس بدأ يدخل في قلب سيدنا موسى ، طب الحمد أتى منين؟ ربنا في الأول قال له "إِنِّي أَنَا رَبُّكَ" كلمه عن النعم ، أول ما كلمه عن النعم الحب دخل في قلبه ، كأن القلوب الطاهرة أول ما تفتكر نعم ربنا الحب يملأ قلوبها ، فسيدنا موسى لما حس بحب الله ، قعد يطول في الكلام بقى ، حس بالأنس ، مش عاوز الدنيا و لا عاوز يرجع لمراته ، ده أنت مراتك مستنياك ، مراتي إيه و دنيا إيه؟! ده أنا مع الله سبحانه و تعالى.

## تعظيم الله

"قَالَ أَلْقِهَا يَا مُوسَى" طه: ١٩ بعد ما حب الله دخل القلب ، لازم تعظيم الله يدخل القلب ، و تعظيم الله ما ينفعش يدخل القلب و قلبك فيه الأسباب ، العصا اللي أنت بتقول انك بتعمل بها ده و ده و ده ، ارميها ، بعض العلماء

خذ من الآية دي إيه؟ سيدنا موسى رمى العصا فعلاً ، و لكن ربنا كان يريد أن هو و يرميها من يده يرميها من قلبه ، أن الأسباب تخرج من قلبك ، إن مايقاش في قلبك لا حب و لا تعظيم لغير الله سبحانه و تعالى **"فَأَلْقَاهَا فَإِذَا هِيَ حَبَّةٌ تَسْعَى"** طه: ٢٠ إيه ده؟ ده العصاية اتقلبت تعبان ، طب التعبان ممكن يقرصني ، سيدنا موسى بدأ يخاف ، ربنا قاله **"لَا تَخَفْ"** طه: ٢١ لا تخف ، لا تخف دي يا جماعة اتكررت في كم سورة في الموقف اللي في الكلام ما بين ربنا و بين سيدنا موسى؟ اتكررت كثير ، ده ربنا بيقله **"خُذْهَا وَلَا تَخَفْ"** طه: ٢١ **"لَا تَخَفْ"** اتكررت كم مرة في القرآن؟ ٣ مرات ، ٣ مرات ربنا قال لسيدنا موسى **"لَا تَخَفْ"** **"أَقْبِلْ وَلَا تَخَفْ"** القصص: ٣١ بعض العلماء قال إن سيدنا موسى على بال ما تجراً أنه يمد يده و يمسك الشعبان ، و هو واثق إن ربنا هيرجعه عصاية ، ربنا قاله **"خُذْهَا وَلَا تَخَفْ"** ايوه ، في الأول كدة ، في الأول ممكن أن أنت تكون متردد شوية ، إنما بعد ما تعرف ربنا - البحر قدامك و فرعون وراك - فرعون مين؟ وسيوفه مين؟ و جيوش مصر مين؟ و بحر مين ده ، أنا معي الله سبحانه و تعالى ، فالتربية ، التربية هي اللي بتحول ده لده ، التربية هي اللي بترفعك لمقامات مهولة ، بعد ما كنت إيه؟ ٣ مرات **"لَا تَخَفْ"** عشان يمد يده يأخذها.

### آيات الله

**"قَالَ خُذْهَا وَلَا تَخَفْ سَنُعِيدُهَا سِيرَتَهَا الْأُولَى"** طه: ٢١ يمسك العصاية و هي لسه تعبان ، تتحول عصاية تانية ، الثقة تيجي في قلب سيدنا موسى أن ربنا لا يمكن يوجهه حاجة و يبقى فيها ضرر أبدا ، بعد كدة ربنا يوريله الآيات ، بعد النعم أدي أول آية ، و كمان آية **"وَاضْمُمْ يَدَكَ إِلَى جَنَاحِكَ تَخْرُجَ بَيْضَاءً"** طه: ٢٢ يبقى ربنا قاعد يوري لسيدنا موسى النعم ، و يوري لسيدنا موسى الآيات ، و يوري لسيدنا موسى الكرامات ، و غير ده خد بالك يا موسى ، خدوا بالكم يا جماعة **"لِنُرِيكَ مِنْ آيَاتِنَا الْكُبْرَى"** طه: ٢٣ أنت عاوز تشوف الآيات الأعظم الأكثر ، اللي أعظم بكثير **"لِنُرِيكَ مِنْ آيَاتِنَا الْكُبْرَى \* اذْهَبْ إِلَى فِرْعَوْنَ"** طه: ٢٣ : ٢٤

اعمل في الدعوة ، تر آيات الله

عاوز تشوف الآيات المبهرة؟ اشتغل في الدعوة ، عاوز تشوف الكرامات؟ اشتغل في الدعوة ، عاوز تشوف النبي صلى الله عليه وسلم في المنام؟ اشتغل في الدعوة ، عاوز ربنا يرتب حياتك و يرتب أمورك ، و ينصرك و يرفعك ، و يتزل الفتوحات عليك ، و يوريك الكرامات و الآيات ، و يجيب دعائك؟ اشتغل في الدعوة **"لِنُرِيكَ مِنْ آيَاتِنَا الْكُبْرَى"** روح لفرعون ، انزل الواقع و تكلم عن ربنا و قف في وجه اللي بيحاربوا ربنا ، و تكلم بكل قوة في وجه أي إنسان ينتهك حرمت ربنا ، هي دي قمة معرفة الله اللي ساعتها كرامات ربنا و آيات ربنا العظمى هتتزل عليك.

### ماذا يحتاج الإنسان في طريق الدعوة

سيدنا موسى ساعتها قام قايل إيه؟ **"اشْرَحْ لِي صَدْرِي \* وَيَسِّرْ لِي أَمْرِي"** طه: ٢٥ : ٢٦ الإنسان يا جماعة عشان يمشي في الطريق إلى الله ، لازم حاجتين :

١. لازم هو يبسر للطريق ، يعني أنا ممكن معاي خمسين واحد بيدعوني للإلتزام ، بس ربنا لسه ما فتحش قلبي ، لسه الدين تقيل علي ، لسه الدعوة تقيلة علي ، فأول حاجة أن تُيسرَ للطريق ، أن ربنا يشرح صدرك للدعوة

٢. أنا ممكن اجي اشتغل في الدعوة ألاقي أبوي عيان يقلي أقعد جنبي ، أو أنا فقير عاوز أشتغل و ما فيش وقت أدعو ، أو ألاقي الامتحانات ، يبقى الحاجة الثانية أن الطريق هو اللي يُيسر ليك ، أنك تلاقي الظروف سهلة ، و المدعوين أدهم عينك ، و تيجي تكلم ده يجي معاك ، و تلاقي الظروف أمامك مسموح بها أنك أنت تدعو إلى الله. يبقى سيدنا موسى دعا ربنا بدعائين ، يا رب يسرني للطريق ، ويسر الطريق ليا

**"اشرح لي صدري"** خليني أحب الدعوة يا رب ، خليني أحب تنفيذ أوامرك يا رب ، اشرح صدري لتنفيذ طلباتك يا رب **"ويسر لي أمري"** و يسر لي الطريق إيه الدعوة اللي سيدنا موسى دعا بها الأول ؟ أن الطريق ييسر ليه ، أو أن هو ييسر للطريق ؟ أن هو ييسر للطريق ، علامة أن هي دي الحاجة العالية ، هي دي الحاجة الصعبة ، أن فعلا ربنا يشرح صدرك أنك تبقى رجل من رجال الإسلام على الأرض ، أنك تبقى جندي من جنود الله على الأرض ، أنك أنت تبقى داعية من الدعاة إلى الله ، إن شرح صدرك فتبقى دي أول عقبة زالت بإذن الله.

إجابة الدعاء

لما سيدنا موسى دعا ربنا ، ربنا قاله إيه ؟ **"قَالَ قَدْ أُوتِيتَ سُؤْلَكَ يَا مُوسَى"** طه: ٣٦ خدوا بالكم يا جماعة ، إجابة الدعاء ، لازم تعيشوا التجارب دي ، لازم تعيش تجربة أنك بترفع إيدك للسماء ، و ربنا بيترك الإجابة ، لازم ، ده جزء أساسي من تربيتك على الثقة في الله ، إذا كنت أنت مامريتش بالتجارب دي ، و رأيت النعم ، مامريتش بتجارب و شف آيات ربنا ، و تدبرت في الكون ، مامريتش بتجارب و شف إجابة الدعاء ، هتخرج تدعو الناس إلى الله إزاي ؟ و أنت ما تعرفش الله أصلاً ، و أنت ما عندكش ثقة يقينية في الله. شوفوا بعد كدة ربنا بيعمل مع سيدنا موسى إيه ؟ شوط طويل جدا ، بس شوط خطير ، يشرح لنا بالضبط أول ابتداء العلاقة مع الله شكله إيه ، يشرح لك بالضبط التربية ، المرحلة الأولى في تربيتك لازم تبقى ملاحظها إيه.

### قصة حياة سيدنا موسى

شوفوا ربنا يقول لسيدنا موسى إيه ؟ **"وَلَقَدْ مَنَّا عَلَىكَ مَرَّةً أُخْرَى \* إِذْ أَوْحَيْنَا إِلَىٰ أُمِّكَ مَا يُوحَى \* أَنْ اقْدِفِي فِي الثَّابُوتِ"** طه: ٣٧ : ٣٩ إيه ده ؟ ربنا يقول لسيدنا موسى قصة حياته تاني ، طبعاً ما أنا عارف القصة يا رب ، ده أنا حافظها يا رب ، عارف أن أمي رمطني في المية ، و فرعون خدني ، و بعد كدة هربت لمدين و قتلت نفس ، و بعد كدة ، أنا عارف يا رب القصة دي. لا يا جماعة ، ربنا يقول لسيدنا موسى إيه ؟ **"أَنَّ اقْدِفِي فِي الثَّابُوتِ فَاقْدِفِي فِي الْيَمِّ فَلْيَلْقِهِ الْيَمُّ بِالسَّاحِلِ"** طه: ٣٩ يا رب ما أنا عارف القصة دي ، يا جماعة ربنا بيعرض لسيدنا موسى قصة حياته بس بطريقة ثانية ، كأنه بيقوله شوف أنا لولا كنت معاك ، حياتك لا يمكن كانت تمشي بالطريقة دي ، أنا عايزك تقعد بالليل كدة و تجيب قصة حياتك ، و تفتكرها من زمان ، و تقول أنا لولا ربنا كانت حياتي مشت كدة ، أنا لولا ربنا كنت دخلت الكلية دي ، أنا لولا ربنا كنت دخلت المسجد ، أنا لولا ربنا كان زمان فكري هو الفكر الموجود دلوقتي ، أنا لولا ربنا كان زمان حياتي و ديني و دنيتي ماشيين كدة دلوقتي.

### كن مع الله يرتب حياتك

وكل ما تبقى مع الله أكثر ، هو سيدنا موسى كان الله معه ليه ؟ و كان بيرتبه أوي ليه ؟ لأنه كان مع الله يا جماعة ، كل ما هتبقى مع الله كل ما تحس أن ربنا هو اللي بيمشيلك حياتك ، و هو اللي بيعركك أمورك ، بحيث لو أنك

أنت من الوقت أهو لثلاث سنين جاين عشت فيهم مع الله ، و اجتهدت فيهم مع الله ، هتيجي بعد ثلاث سنين أقعد أقلك نفس الكلمة ، أقولك افكر قصة حياتك ، تقولي ياه ، ده أنا لو قعدت افكر ربنا مشى لي حياتي إزاي مش هخلص ، ليه ؟ لأنك بقيت مع الله ، فربنا اللي مشالك حياتك ، فربنا كأنه بيقولك افكر حياتك القديمة ، افكر ربنا مشالك إزاي ، الموقف ده ربنا أنقذني إزاي ، و الموقف ده ربنا رتبهولي إزاي ، والنعمة دي ربنا جاها لي إزاي ، والمشكلة الفظيعة اللي كنت هموت منها ربنا حلها لي إزاي ، و الدين بعد ما كان قلبي مقفول ربنا شرحلي صدري له إزاي ، افكر ربنا مشالك حياتك إزاي

"**أَنْ أَقْذِفِيهِ فِي التَّابُوتِ فَاقْذِفِيهِ فِي الْيَمِّ فَلْيُلْقِهِ الْيَمُّ بِالسَّاحِلِ**" طه: ٣٩ اقدفيه ؟ ده طفل عنده ساعتين ثلاثة ، لو اترمي في التابوت يموت بالطريقة دي ، يعني حطيه بالراحة في التابوت ، و بعد كدة حطي التابوت بالراحة في المية ، ده أنت لو رميت التابوت في المية ، هيتقلب بموجة واحدة ، و يوقع الطفل و يغرق ، ربنا بيقول لسيدنا موسى ، بيصور له مشهد ولادته ، إنتم فاكرين يا جماعة إن أم موسى كانت قاعدة في البيت كدة ، قاعدة تقول يا ترى أرميه و لا ما ارميهوش؟ لا يا جماعة ، ده أول ما ولدته جند فرعون خدوا خبر ، الحقوا في ولد اتولد في البيت الفلاني ، و الجنود رايحين و القوة البوليسية جاية عشان تقبض على هذا الطفل و تقتله ، و أمه قدامها لحظات ، يا تلحق يا ما تلحقتش ، فبسرة "**أَنْ أَقْذِفِيهِ فِي التَّابُوتِ فَاقْذِفِيهِ فِي الْيَمِّ**" فربنا بيصور لسيدنا موسى المشهد المريع اللي حصل و هو مولود ، أمه بترميه بسرعة في البحر ، أي حاجة ، البحر أرحم من أن هو يتحط في إيد جنود فرعون "**فَلْيُلْقِهِ الْيَمُّ بِالسَّاحِلِ**" و فاكر لما خلقت المية تشيلك ، لأن المية دي عبد من عبيدي ، لأن النهر ده عبد من عبيدي ، عبودية الكون لله ، و توديك لحد قصر فرعون ، فرعون ؟ ايوه ، شوف ربنا بيقوله "**فَرَجَعْنَاكَ إِلَى أُمِّكَ**" طه: ٤٠ عارفين يعني إيه "**فَرَجَعْنَاكَ**" يا جماعة؟

في سورة ثانية ، سورة القصص "**فَرَدَدْنَاهُ إِلَى أُمِّهِ**" القصص: ١٣ إيه الفرق بين الرد و الإرجاع ؟ الرد يا جماعة إن أنا خدت أمانة و ردتها لك ، فكأن في سورة القصص ربنا بيقول لأم موسى ، ابنك ده أنت مش بترميه في البحر ، أنت بترميه في ايدي ، ده أمانة أنا هرجعها لك ، أما هنا في سورة طه "**فَرَجَعْنَاكَ**" يعني بالضبط زي ما أنت ماسك حاجة ، قام خاطفها و جاري ، تيجي تلحقه ، أقولك استنى أنا هرجعها لك ، بقدرة الله رجع موسى من إيد فرعون ، كأن المراد في سورة طه غير المراد في سورة القصص ، المراد في سورة طه أن كأن ربنا يقول لموسى أنا بقدرتي رجعتك من ايد فرعون لأملك تاني و لحضن أمك تاني ، واخدين بالكم من المعنى ، يعني كأن ربنا بيقول لسيدنا موسى شوف أنا حياتك كانت تمشي إزاي من غيري ؟ لا يمكن تمشي

"**إِذْ تَمْشِي أُخْتُكَ فَتَقُولُ هَلْ أَدُلُّكُمْ عَلَىٰ مَن يَكْفُلُهُ**" طه: ٤٠ الذكاء بتاع أخت موسى ، مش أول ما شافت أخوها في مدينة فرعون اترعبت وطلعت تجري عليه أخوي ... لا ... "**تَمْشِي**" كأن هي مش عارفة حاجة ، و كأن الطفل لا يعنيهيا بشيء ، ذكاء أخته موسى ، يعني كأن ربنا في النص بيقولك إيه ؟ الذكاء و الفطنة ، و مين اللي أهمها في هذا الموقف و مين اللي ثبتها ؟ فربنا سبحانه و تعالى بيعمل إيه مع موسى يا جماعة ؟ شوفوا ربنا عمل إيه مع موسى في الأول ، أراه الآيات ، العصا و يده ، ووعده بالمعجزات ، لو اشتغلت في الدعوة هوريك الأخطر و الأكبر ،



وأجاب له الدعوات ، لما دعا ربنا أجب له الدعاء ، وذكره بالنعمة ، ذكره حياتك كانت هتمشي إزاي من غيري ، وغير كدة كمان وشرفه بالكلمات ، **"يا مُوسَى" و "أنا اختَرْتُكَ"** المرحلة الأولى من التربية التفكير بنعم الله

كأن أنا عاوز أخرج من هنا يايه ؟ المرحلة الأولى في التربية لازم تبقى دي ملاحظها ، عايزين يا جماعة نعيش فترة بحياتنا ، حياتنا كلها قاعدين عايشين مع نعم الله ، حياتنا كلها قاعدين رايحين نتدبر في الكون، أنتم وراكم إيه ؟ أنت وراك إيه ؟ دراسة إيه ؟ لو أنت طالب في أصعب كلية ، وذاكرت ٤ ساعات في اليوم هتطلع من العشرة الأوائل ، يعني أنت عندك عشرين ساعة فاضي ، كمان منهم أربع ساعات في المحاضرات عندك ١٦ ساعة ، ثمت ثمانية ، عندك ٨ ساعات ، أنت وراك إيه ، أنتم دلوقتي تقدرُوا أنكم تعملوا بطولات إيمانية في فترة الكلية بتاعتكم ، يعني أنت دلوقتي إيه المشكلة أنك كل يوم العصر - بعد رمضان - تاخذ المصحف بتاعك وتطلع على مكان خلوي تتدبر فيه ، تقرا آيات الله القرآنية ، وتتدبر في آيات الله الكونية ، عيشوا مع آيات الله ، و عيشوا مع نعم الله ، و اجتهدوا في التربية القلبية عشان تشوفوا آيات ربنا ، و الكرامات و إجابة الدعوات ، عيش مع الله هذه الفترة عشان هي دي أول مرحلة من مراحل التربية اللي ربنا ربي عليها سيدنا موسى.

### الشوط الثاني من قصة سيدنا موسى

هندخل بعد كدة في المرحلة الثانية **"أَذْهَبْ أَنْتَ وَأَخُوكَ بِآيَاتِي وَلَا تَنِيَا فِي ذِكْرِي"** طه: ٤٢ قبل ما ربنا يقوله روح ، إداله السلاح بتاعه **"لَا تَنِيَا فِي ذِكْرِي"** ما تبطلش لحظة ذكر ، ما تبطلش الذكر لحظة ، هو ده الزاد بتاعك ، العبادة ، عشان كدة المرحلة الأولانية دي لازم كلها عبادة ، لازم ، لما العبادة و الإيمانيات كلها ملت قلبك اخرج بقى للواقع ، راح سيدنا موسى لفرعون فعلاً **"أَذْهَبَا إِلَيَّ فِرْعَوْنَ إِنَّهُ طَغَى \* فَقَوْلَا لَهُ قَوْلًا لَيِّنًا"** طه: ٤٣ : ٤٤ دي المرحلة الثانية في قصة سيدنا موسى ، **"قَوْلًا لَيِّنًا"** ؟ آه ، لفرعون ؟ آه ، طيب هو سيدنا موسى كلم فرعون عن الجنة بس و لا عن الجنة و النار ؟ قاله **"أَنَّ الْعَذَابَ عَلَىٰ مَنْ كَذَّبَ وَتَوَلَّى"** طه: ٤٨ صح و لا لأ ؟ يبقى القول اللين ليس معناه أن احنا مانكلمش الناس عن النار ، القول اللين مش معناه زي ما بعض الناس فاهمة ما تكلمش الناس عن النار و القبر ، لا يا جماعة ، القول اللين هو الرفق والرحمة والحكمة ، إنما لا يعني أبدأ أن أنت ما تكلمش الناس عن النار

**"فَقَوْلَا لَهُ قَوْلًا لَيِّنًا لَعَلَّهُ"** طه: ٤٤ شافين رحمة ربنا **"قَوْلًا لَهُ قَوْلًا لَيِّنًا لَعَلَّهُ يَتَذَكَّرُ أَوْ يَخْشَى \* قَالَ رَبَّنَا إِنَّا نَخَافُ أَنْ يُفْرِطَ عَلَيْنَا أَوْ أَنْ يَطْغَى \* قَالَ لَا تَخَافَا إِنِّي مَعَكُمَا أَسْمَعُ وَأَرَى \* فَأْتِيَاهُ فَقَوْلَا إِنَّا رَسُولَا رَبِّكَ فَأَرْسِلْ مَعَنَا بَنِي إِسْرَائِيلَ"** طه: ٤٤ : ٤٧ خدوا بالكم يا جماعة ، إنا رسولا إيه ؟ ربك ، زي ما ربنا أول حاجة كلم فيها موسى الربوبية ، أول حاجة سيدنا موسى كلم فيها فرعون الربوبية ، خدوا بالكم أول حاجة لازم نكلم الناس فيها في فن الدعوة نعم ربنا عليهم ، أول حاجة لازم نفتح بيها القلوب نعم ربنا ، على أد ما تقدر تتكلم عن نعم ربنا على أد ما تقدر تبقى داعية ناجح ، و شوفوا سيدنا موسى بيقول لفرعون إيه **"إِنَّا رَسُولَا رَبِّكَ"** أنا عاوزك تتخيل موقف فرعون و هو قاعد كدة ، لقي اثنين داخلين عليه ، فيه إيه ؟ احنا جاينلك من عند ربك ، ربك ؟ آه **"إِنَّا رَسُولَا رَبِّكَ فَأَرْسِلْ مَعَنَا بَنِي إِسْرَائِيلَ وَلَا تُعَذِّبْهُمْ"** طه: ٤٧ ربك بيقولك هات بني إسرائيل و لا تعذبهم **"قَدْ جِئْنَاكَ بِآيَةٍ مِنْ**

**رَبِّكَ** طه: ٤٧ ربك باعتلك آيات عشان يعرفك إن احنا جاينين من عنده **"وَالسَّلَامُ عَلَيَّ مَنِ اتَّبَعَ الْهُدَى"** طه: ٤٧ ربك لا يسلم أبداً إلا اللي بيتبع أمره **"إِنَّا قَدْ أُوحِيَ إِلَيْنَا أَنَّ الْعَذَابَ عَلَىٰ مَن كَذَّبَ وَتَوَلَّىٰ"** طه: ٤٨ ربك بيقولك أنه هيعذبك لو ما بعتش.

### ثقة أهل الحق تنزل أهل الباطل

إيه ده يا جماعة؟ فرعون لما سمع الكلام ده ، انت تحس كدة أنه قام راجع لورا ، إيه ده ؟ **"قَالَ فَمَنْ رَبُّكُمَا يَا مُوسَىٰ"** طه: ٤٩ أنتم جاينين من عند مين ؟ أحسن يكون في واحد فعلاً عظيم أوي موجود على الأرض و أنا معروفش ، و أنتم اللي جاينين من عنده ، تحس أنه من كتر ثقتك في الحق بترعب أهل الباطل ، لو أنت واثق و رحت بيتك و أهلك فالولك لا سيب الإلتزام ، و لا سيب المسجد و لا سيب أصحابك ، لو أنت واثق هتهزهم ، لو واحدة واثقة و لبست نقاب ، ثقته و ثباتها هتهز أهلها ، يخليهم ما يعرفوش يحاربوها ، عاوزين يا جماعة نبقي واثقين ، ثباتنا هو اللي بيزنزل اللي قدامنا، ثباتنا هو اللي بيوقع اللي قدامنا، عاوزين نبقي ثابتين على الحق اللي احنا عليه.

**"قَالَ فَمَنْ رَبُّكُمَا يَا مُوسَىٰ \* قَالَ رَبُّنَا الَّذِي أَعْطَىٰ كُلَّ شَيْءٍ خَلْقَهُ ثُمَّ هَدَىٰ"** طه: ٤٩ : ٥٠ إيه ده ؟ هو ده ؟ يا عم أنا حسبت إن في واحد ثاني على الأرض بجد أقوى مني و لا حاجة ، شايفين الكبر على الله ، يعني لما عرف أنه يقصد به رب السماوات والأرض استكبر ، و لما كان ممكن يكون واحد ثاني سأل **"قَالَ فَمَنْ رَبُّكُمَا يَا مُوسَىٰ"** إنما شوف الكلمة الجميلة اللي سيدنا موسى قالها **"رَبُّنَا الَّذِي أَعْطَىٰ كُلَّ شَيْءٍ خَلْقَهُ ثُمَّ هَدَىٰ"** الآية دي عاوزين نعيش معاها يا جماعة ، يعني تحيل كل حاجة ربنا أعطاها خلق غير الثاني ، حتى أنواع النوع الواحد ، السمك أعطاه عشرين ألف صورة من صور الخلق ، الطيور أعطاها تسعة آلاف صورة من صور الخلق ، كل حاجة لها صورة غير الثانية

**"ثُمَّ هَدَىٰ"** أعطى الله ده المنقار الطويل ثم هداه لأكل الديدان في الطين ، أعطى للطائر اللي يطير على وش المية العينين اللي تعرف تجبلك اللي جوة المية ، و هداه لأكل السمك في المية ، كل حاجة ربنا أعطاها خلق يناسب الوظيفة بتاعتها ، إنما مش زى ما كنا بندرس في الإعدادى - عن التحور - إزاي أن البط حور رجلية و حور منقاره عشان يناسب البيئة بتاعته ، و إزاي الهدد ، هدهد إيه يا جماعة و بط إيه اللي يجوروا ! إحنا فين يا جماعة ؟ الله هو الذي أعطى لكل شيء خلقه ، ثم هدى.

### الحرب الإعلامية على سيدنا موسى

فده موسى مع فرعون ، بعد كدة الموضوع بيتطور ، لا ده أنت لازم حد يوقف في وشك ، اجمعوا لي السحرة ، يجمع فرعون السحرة ، تبدأ ملامح المعركة تتضح ، المعركة كل واحد عدته إيه ؟ العدة بتاعة فرعون : هاتوا لي سحرة مصر كلها ، هاتوا لي أعظم سحرة ، و السحرة لا و كمان ، و انشروا في البلد كلها حرب إعلامية هائلة على موسى.

**"وَأَن يُخَشِرَ النَّاسُ ضُحَىٰ"** طه: ٥٩ هاتوا الناس كلها ، و اجمعوا الناس كلها **"لَعَلَّنَا نَتَّبِعُ السَّحَرَةَ إِن كَانُوا هُمْ الْغَالِبِينَ"** الشعراء: ٤٠ و هاتوا الناس و السحرة قولوا لهم إيه؟ **"قَالُوا إِن هَٰذَانِ لَسَاحِرَانِ يُرِي دَهْنًا أَن يُخْرِجَاكُم**

**مِنْ أَرْضِكُمْ بِسِحْرِهِمَا** طه: ٦٣ الحرب الإعلامية المهولة ضد موسى ، و شحن النفوس كلها ضد موسى **فَأَجْمِعُوا كَيْدَكُمْ ثُمَّ آتُوا صَفًا** طه: ٦٤  
الثقة في الله سلاحك

الحرب المادية و الإمكانيات المهولة ضد موسى ، مصر كلها واقفة ضد موسى ، الشعب و السحرة و القيادة و الحكومة و القائد ، كله واقف ضد موسى ، و سيدنا موسى عدته إيه ؟ ما فيش أي عدة ، طب أنت هتعمل إيه ؟ ما عرفش ، طب هو ربنا قالك إن العصا هتتحول تعبان تاكل الناس؟ لا مقلش ، امال أنت رايح تناظر الناس دي و تحارب الناس دي ؟ أنا واثق أن ربنا سبحانه و تعالى مش هيسيبي ، مادام دي دعوة و أنا نازل أدعو إلى الله ، و اللي وجهني للأمر ده هو الله ، الله مش هيسيبي ، شايفين عدة مصر كلها و عدة موسى ، عدة مصر الأسباب كلها ، و عدة موسى الثقة في الله **"سُبْحَانَ رَبِّي" الإسراء: ٩٣ "وَأَلْقَى مَا فِي يَمِينِكَ تَلْقَفُ مَا صَنَعُوا" طه: ٦٩** آه شايفين يا جماعة ، الثقة في الله بتنجيب إيه ، النصر المؤزر المين اللي ربنا نصر به موسى **"إِنَّمَا صَنَعُوا كَيْدُ سَاحِرٍ وَلَا يُفْلِحُ السَّاحِرُ حَيْثُ أَتَى" طه: ٦٩** يبقى كل ده كان كيد ساحر ، فربنا سبحانه و تعالى نصر موسى

و نلاقي **"قَالَ بَلْ أَلْقُوا فَإِذَا حِبَالُهُمْ وَعِصِيُّهُمْ يُخَيَّلُ إِلَيْهِ مِنْ سِحْرِهِمْ أَنَّهَا تَسْعَى" طه: ٦٦** سيدنا موسى ، إيه ده ؟ هي بتمشي و لا مبتمشيش ؟ هي بتمشي و لا لأ ؟ إنما المصريين لما شافوها قالوا إيه ؟ **"فَلَمَّا أَلْقَوْا سَحَرُوا أَعْيُنَ النَّاسِ وَاسْتَرْهَبُوهُمْ وَجَاءُوا بِسِحْرٍ عَظِيمٍ" الأعراف: ١١٦** شايفين فارق أثر السحر على الاثنين ، كل ما إيمانك يزيد السحر و الحسد و الحاجات دي تأثيرها يقل عليك ، كل ما إيمانك و يقينك يعلى ، كل ما الحاجات دي تأثيرها يقل عليك ، عشان كدة اللي بيقولي أو اللي بتقولي أنا معمولي سحر أو عمل ، لو يقينك عالي بالله و إيمانك عالي بالله ، و عبادتك عالية لله الحاجات دي هيبقى تأثيرها عليك أضعف من أي أثر ممكن يؤثر عليك في حياتك ، فشايفين الإيمان يا جماعة بيرفع إزاي ، شايفين الإيمان بيوصل لدرجة إيه ؟

فيه حاجة هنا **"فَأَوْجَسَ فِي نَفْسِهِ خِيفَةً مُوسَى" طه: ٦٧** الكلمة دي عاوزين نوقف معاها ، إن سيدنا موسى يا جماعة عما وصل للثقة الكاملة بالله ، اللي هي **"كَلَّا إِنَّ مَعِيَ رَبِّي سَيَهْدِينِ" الشعراء: ٦٢** مر بمراحل طويلة ، منها بس أربع مراحل لما ربنا قال له امسك العصاية ، و هي تعبان و خاف و بعد كدة مسكها ، فرجعت عصاية تاني ، بدأت تيجي الثقة إن ربنا لا يمكن يوجهه لأمر أبداً و يكون فيه ضرر ، بعد كدة **"أَذْهَبَا إِلَى فِرْعَوْنَ" لا يا رب أنا خايف ، بس كان الأول الخوف "وَلَّى مُدْبِرًا وَلَمْ يُعَقِّبْ" النمل: ١٠** طلع يجري ، إنما المرة الثانية ماجراش لما ربنا قال له روح لفرعون ، و ما قالش فرعون و طلع يجري ، لا ، قال **"إِنَّا نَخَافُ أَنْ يُفْرِطَ عَلَيْنَا أَوْ أَنْ يَطَّعَى" طه: ٤٥** بقى كلام ، ربنا طمنه

بعد كدة لما جي في موقف السحرة ، و لقي السحر المين بتاعهم ده **"فَأَوْجَسَ فِي نَفْسِهِ خِيفَةً" طه: ٦٧** لا طلع يجري ، و لا قال أنا خايف إنما جي حاجة كدة بسرعة في صدره ، هاجس خوف سريع كدة في صدره ، ربنا قاله **"قُلْنَا لَا تَخَفْ إِنَّكَ أَنْتَ الْأَعْلَى" طه: ٦٨** لقت العصاية ما صنعوا ، جات الثقة الكاملة أن طول ما هو مع الله النصر معاه ، و الحفظ معاه و المعية معاه و الولاية معاه ، بعد كدة البحر قدامه و فرعون وراه ، قال **"كَلَّا إِنَّ مَعِيَ رَبِّي" الشعراء: ٦٢** يعني قطع المراحل الطوال دول ، لازم أقطعهم عشان قلبي يتربي ؟ لا يا حبيبي ، ده قبل الأربع

المراحل دول لسه في مراحل ثانية كثير ، رينا في سورة القصص لما بين سيدنا موسى يوكز المصري فيقضي عليه ، قال **"قَالَ رَبِّ إِنِّي ظَلَمْتُ نَفْسِي فَاغْفِرْ لِي"** القصص: ١٦  
 لما يستشعر بالإجابة **"قَالَ رَبِّ بِمَا أَنْعَمْتَ عَلَيَّ فَلَنْ أَكُونَ ظَهِيرًا لِلْمُجْرِمِينَ"** القصص: ١٧ لما يجيله واحد يقول له  
 الملاء بيأتمروا بك و عاوزين يقتلوك **"قَالَ رَبِّ نَجِّنِي مِنَ الْقَوْمِ الظَّالِمِينَ"** القصص: ٢١ لما يطلع يجري هربان من  
 مصر كلها ، و جنود فرعون بيدوروا عليه **"قَالَ عَسَى رَبِّي أَنْ يَهْدِيَنِي سَوَاءَ السَّبِيلِ"** القصص: ٢٢  
 لما يروح مدين جعان و تعبان و ما هوش عارف يعمل إيه **"رَبِّ إِنِّي لِمَا أَنْزَلْتَ إِلَيَّ مِنْ خَيْرٍ فَقِيرٌ"** القصص: ٢٤  
**التربية القلبية مرحلتان**

يعني رينا بيقلك التربية القلبية مرحلتين :

١. **المرحلة الأولانية** : قبل الرسالة ، اللي هي تعلق القلب بالله : رب ، رب ، رب ، سيدنا موسى كان قلبه متعلق بالله تعلق هائل ، عشان كدة رينا كلمه ، اشعنى هو ، من كتر ما كلم الله ، و من كتر ما دعا الله ، و من كتر ما ناجى الله

٢. **ثم بعد ما يدخل تعلق القلب بالله ، لازم يخرج المخلوق من القلب** ، هو ده اللي حصل في سورة طه ، يخرج الخوف من العصاية ، و الخوف من فرعون ، و الخوف من السحرة ، و الخوف من البحر ، يخرج الخوف من كل ده ، هي دي التربية القلبية. طريق طويل ، بس لازم تمشيه ، شايفين الطريق الطويل ده سيدنا إبراهيم قطعه في أد إيه ؟ يا جماعة ؟ سيدنا موسى خد فيه سنين ، سيدنا إبراهيم قطعه في أد إيه ؟ في يوم ، في سورة الأنعام لما كنا نشرح موقف التدبر ، لما تدبر في الكوكب قال إيه **"قَالَ لَا أَحِبُّ الْأَفْلِينَ"** الأنعام: ٧٦ خرج المخلوق من قلبه ، لما تدبر في القمر قال **"قَالَ لَئِن لَّمْ يَهْدِنِي رَبِّي لَأَكُونَنَّ مِنَ الْقَوْمِ الضَّالِّينَ"** الأنعام: ٧٧ الإفتقار ، دخل تعلق القلب بالله في قلبه ، المرحلة اللي بعد كدة قال **"وَجَّهْتُ وَجْهِيَ لِلَّذِي فَطَرَ السَّمَاوَاتِ وَالْأَرْضَ حَنِيفًا وَمَا أَنَا مِنَ الْمُشْرِكِينَ"** الأنعام: ٧٩

**لا تحبط إذا تأخرت المهم أن تصل**

يعني إذا ممكن توصل في سرعة كبيرة جدا، و ممكن تفضل فترة ، أنا أقول الكلام ده ليه؟ أنا أقول الكلام ده لأن سيدنا موسى و سيدنا إبراهيم الإثنين من أولي العزم من الرسل ، و الاثنين أعلى المقامات عند الله ، يعني عاوز أقولك لما تلاقي واحد صاحبك سبقك في الطريق إلى الله ما تحبطش ، لما تلاقي واحد تحصيله أعلم منك ما تحبطش ، لما تلاقي واحد التزم بعدك و دلوقتي بيشتغل في الدعوة و العبادة و مجتهد ما تحبطش ، طول ما أنت ماشي في الطريق هتوصل ، حتى لو الطريق خد منك فترة أطول من غيرك ، المهم توصل في الآخر ، يعني أنا عاوز أقول يا جماعة أن طريق التربية القلبية طويل ، ممكن تقطعه بسرعة و ممكن تأخذ فترة ، و لكن المهم توصل ، المهم تقطعه ، المهم توصل أن قلبك فعلاً في الآخر بقى قلب سليم ، ياذن الله سبحانه و تعالى.

**إسلام السحرة**

بعد كدة صورة السحرة بعد ما أسلموا يا جماعة ، فرعون يقول لهم **"فَلَأَقْطَعَنَّ أَيْدِيَكُمْ وَأَرْجُلَكُمْ مِنْ خِلَافٍ وَلَأَصْلَبَنَّكُمْ فِي جُذُوعِ النَّخْلِ وَلَتَعْلَمُنَّ أَيُّنَا أَشَدُّ عَذَابًا وَأَبْقَى"** طه: ٧١ ده أنا هأدبكم ، ده أنا هأقطعكم حتت ،

ده أنا هأفرمكم ، فرعون بيقول لهم كدة ! **"قَالُوا لَنْ نُؤْتِرَكَ عَلَى مَا جَاءَنَا مِنَ الْبَيْنَاتِ وَالَّذِي فَطَرَنَا طه: ٧٢ يا اياه ، شايقين الإيمان ؟ شايقين الإيمان و اليقين اللي دخل في قلوبهم ؟ جابوا الإيمان ده منين ؟ الإيمان الرهيب ده دخل في قلوبهم إزاي؟ طه: ٧٣ "إِنَّا آمَنَّا بِرَبِّنَا لِيَغْفِرَ لَنَا خَطَايَانَا وَمَا أَكْرَهْتَنَا عَلَيْهِ مِنَ السَّحْرِ وَاللَّهُ خَيْرٌ وَأَبْقَى" الإيمان ده كله أتى منين ؟ "إِنَّهُ مَنْ يَأْتِ رَبَّهُ مُجْرِمًا فَإِنَّ لَهُ جَهَنَّمَ لَا يَمُوتُ فِيهَا وَلَا يَحْيَا \* وَمَنْ يَأْتِهِ مُؤْمِنًا قَدْ عَمِلَ الصَّالِحَاتِ فَأُولَئِكَ لَهُمُ الدَّرَجَاتُ الْعُلَى" طه: ٧٤: ٧٥ ده مش إيمان بس يا جماعة ، هم عرفوا منين إن فيه آخرة و فيه ثواب و فيه عقاب ، و الثواب إيه و العقاب إيه ، جابوا العلم ده منين ؟ العلم و الإيمان ده جاهم منين ؟ ده فتح من الله سبحانه و تعالى ، **فُتِحَ عَلَيْهِمْ لِيَه ؟ "فَأَلْقَى السَّحْرَةَ سُجُودًا قَالُوا آمَنَّا" طه: ٧٠** لأن أول ما شافوا الحق استجابوا له ، و قالوا آمنا و هم ساجدين ، و قالوا آمنا برب إيه ؟ **"قَالُوا آمَنَّا بِرَبِّ هَارُونَ وَمُوسَى" طه: ٧٠** في السورة هنا هارون قبل موسى ، ليه يا جماعة قالوا هارون قبل موسى ؟ أصل لو قالوا موسى الأول ، فرعون يقولك أنا ربه ، أنا اللي ربيته و هو صغير ، جابوا هارون الأول اللي فرعون ما لوش علاقة به ، عشان أهل الباطل اللي حوالهم ، ما يشتبهش في ذهنهم ذرة أنهم يقصدوا فرعون ، احنا نقصد الملك سبحانه و تعالى ، شايقين التحدي ، شايقين الصمود ، شايقين سرعة الإستجابة ، تنزلت فتوح العلم و الإيمان عليهم ، لو أنت ثبتت ، لو أنت صمدت لو أنت جاهدت عشان دينك ، لو أنت استحملت عشان ربنا ، الفتوح هتتزل عليك من حيث لا تدري**

#### المشهد الأخير في الشوط الثاني

لما ربنا قال لموسى **"وَلَقَدْ أَوْحَيْنَا إِلَى مُوسَى أَنْ أَسْرِ بِعِبَادِي فَاصْرِبْ لَهُمْ طَرِيقًا فِي الْبَحْرِ يَبَسًا لَا تَخَافُ دَرَكًا وَلَا تَخْشَى \* فَاتَّبَعَهُمْ فِرْعَوْنُ بِجُنُودِهِ" طه: ٧٧: ٧٨ "بِجُنُودِهِ" الباء هنا ، في آية ثانية في سورة يونس "فَاتَّبَعَهُمْ فِرْعَوْنُ وَجُنُودُهُ" يونس: ٩٠** ايه الفرق يا جماعة بين **"بِجُنُودِهِ" و "وَجُنُودِهِ" ؟ "بِجُنُودِهِ" كآهم مش عاوزين يدخلوا بس فرعون يجرحهم غصبا عنهم ، "وَجُنُودِهِ" الإثنين داخلين ما حدش بيحرجر حد**

يعني إيه ؟ أهل الباطل في الأول و هم بيحاربوا أهل الحق ، الجنود بتاعهم في الأول طب احنا نحارب الناس اللي يصلوا و يصوموا ليه ؟ طب احنا نحارب الناس اللي تدعو إلى الله ليه ؟ و احنا نحارب الناس اللي عارفين ربنا ليه ؟ طب ليه نحارب الناس ؟ فيبقى في الأول ضميرهم يؤنبهم و يتجرجر و هو رايح يحاربهم ، بعد ما بيدخل المعركة بتاعتهم بينتكس قلبه ، و يببدأ عد كدة القضية دي هي قضية حياته ، حتى لو ماعدش بياخذ مرتبات و لا بياخذ حاجة ، يفضل يحارب أهل الحق ، حتى لو ما عدش بياخذ أي اعتبار يفضل يحارب أهل الحق ، ليه ؟ لأن بقى دي قضية حياته ، شربها قلبه و العياد بالله.

احنا كدة كمان يا جماعة ، في الأول و أنت رايح تشتغل في الدعوة بتبقى الدعوة ثقيلة على قلبك ، و يبقى الشغل للدين ثقيل على قلبك ، و يبقى طلب العلم ثقيل على قلبك ، و العبادة و المجاهدة الإيمانية ثقيلة على قلبك ، في الأول بتبقى كأنك بتتجرجر ، إنما بعد ما بتدخل و تشوف الأنوار اللي جوا بتبقى قضية حياتك و بتنتقل بسرعة هائلة في الطريق إلى الله سبحانه و تعالى ، يبقى لو لقيت في الأول ممانعة من نفسك ، جاهد نفسك و انطلق إلى الله.

## الشوط الثالث من قصة سيدنا موسى

بقي اللي ظهرت فيه ثمار هذه التربية الرهيبة ، لما ربنا واعد سيدنا موسى للميقات ، فيقول له **"وَمَا أَعَجَلَكَ عَنْ قَوْمِكَ يَا مُوسَى"** طه: ٨٣ إنت جيت بسرعة ليه ؟ كنت اقعدهم معاهم ربيهم على التوحيد شوية **"قَالَ هُمْ أَوْلَاءُ عَلَيَّ أَثَرِي"** طه: ٨٤ يا رب دول عالتوحيد أهم **"وَعَجَلْتُ إِلَيْكَ رَبِّ لِتَرْضَى"** طه: ٨٤ جتلك يا رب ، عجلت إليك يا رب ، لسانك يعجل إلى الله فما تقدرش تتكلم عن أي حاجة تقعد تتكلم عليه بس ، و قلبك يعجل إلى الله ، ما تقدرش تفكر في أي حاجة تفكر في الله بس ، وجوارحك تعجل إلى الله ، أول ما تخلص المحاضرة أول مكان تجري عليه لما تفضى هو بيت الله ، مش مش أصحابك و لا الوقفة الفلانية ، أنك تبقى عاجل إلى الله ، ده الحب يا جماعة ، ده الحب ثمرة التربية اللي ربنا ربي موسى عليها ، الحب ده أول ثمرة **"وَعَجَلْتُ إِلَيْكَ رَبِّ لِتَرْضَى"** طه: ٨٤ طيب ربنا ماقالوش ليه أن قومه عبدوا العجل ؟ سابه لغاية ما الأيام خلصت ، ليه يا جماعة ؟ عشان ده خير لنا ، الفتن دي بتميز الصف ، بتعرف مين الثابت و مين اللي في قلبه شك ، مين الثابت و مين اللي عنصر فتنة ، الفتن اللي بيوقع فيها التيار الإسلامي دلوقتي خير لنا احنا ، خير لنا ليه ؟ زي السحرة بالضبط ، إيه اللي فجر الإيمان اللي قالوه ده ، لما اتخطوا في موقف شدة و في موقف حرب ، لما نتحط في مواقف الشدة دي بيطلع الرجالة ، و بينضج الرجالة ، و بيضطر اللي كانوا دهخلين حاسينها إيه ، لا ، الرجالة اللي عاوزين ربنا بس هم اللي بيفضلوا بالآخر.

## غضب سيدنا موسى

بعد كدة سيدنا موسى لما رجع لقومه **"غَضَبَانَ أَسِفًا"** طه: ٨٦ شوفوا غضب سيدنا موسى ، أول حاجة عملها قال للناس إيه ؟ **"أَعَجَلْتُمْ أَمْرَ رَبِّكُمْ"** الأعراف: ١٥٠ أنتم استعجلتم ، استعجلتم على أن عقوبة ربنا تنزل عليكم ، و بعد كدة أخذ برأس و لحية هارون يجره إليه ، أنتم شايقين المنظر يا جماعة ماسك نبي يجره من رأسه و شعره **"قَالَ يَا هَارُونَ مَا مَنَعَكَ إِذْ رَأَيْتَهُمْ ضَلُّوا \* أَلَّا تَتَّبِعَنِ أَفَعَصَيْتَ أَمْرِي"** طه: ٩٢ : ٩٣ أنا حاسس أن سيدنا موسى كان بيصرخ يا جماعة ، قبل كل ده التوراة اللي ربنا كاتبها له بايديه **"أَلْقَى الْأَلْوَابِحَ"** الأعراف: ١٥٠ يرميها في الأرض ، ترمي كلام ربنا ؟ هو مش داري بنفسه أصلاً ، و مسك سيدنا هارون يجرحه و ده نبي ، يعني كتاب ربنا و أنبياء الله ، إيه يا جماعة الغضب ده ؟ أنتم عارفين الغضب ده ليه؟ ولي و مولاي أنا يُعبد من دونه هذا الصنم في الأرض !! الله يُعبد من دونه هذا الوثن ؟ الغضب بتاع سيدنا موسى يدل على إيه ؟ على التعظيم الهائل اللي في قلبه لله و بعد ما يكلم هارون يمسك السامري **"فَمَا خَطْبُكَ يَا سَامِرِيُّ"** طه: ٩٥ **"قَالَ بَصُرْتُ بِمَا لَمْ يَبْصُرُوا بِهِ فَقَبَضْتُ قَبْضَةً مِّنْ أَثَرِ الرَّسُولِ فَنَبَذْتُهَا وَكَذَلِكَ سَوَّلَتْ لِي نَفْسِي"** طه: ٩٦ بيشرح له إزاي صنع العجل ده **"قَالَ فَادْهَبْ فَإِنَّ لَكَ فِي الْحَيَاةِ أَنْ تَقُولَ لَا مِسَاسَ وَإِنَّ لَكَ مَوْعِدًا لَّنْ أَخْلِفَهُ وَآنظُرْ إِلَى إِلْهِكَ الَّذِي ظَلْتَ عَلَيْهِ عَاكِفًا لَّنُحَرِّقَنَّهُ ثُمَّ لَنَنْسِفَنَّهُ"** طه: ٩٧ **"لَنُحَرِّقَنَّهُ"** بالتشديد و ليس لنحرقنه ، أنا حاسس يا جماعة أن قلب سيدنا موسى و هو يقول الكلام ده ، قلبه مولع نار ، أن حاسس أن النار اللي في قلبه هي اللي بتخلي الألفاظ النارية دي خارجة على لسانه **"ثُمَّ لَنَنْسِفَنَّهُ فِي الْيَوْمِ نَسْفًا"** طه: ٩٧ إيه ده ؟ **"إِنَّمَا إِلْهِكُمُ اللَّهُ"** طه: ٩٨ الغضب لله ده علامة التعظيم لله.

**"وَعَجَلْتُ إِلَيْكَ رَبِّ لِتَرْضَى"** طه: ٨٤ علامة الحب لله. الحب و التعظيم ، زي ما ربنا في أول شوط رباه على النعم اللي بتجيب الحب و الآيات اللي بتجيب التعظيم ، التربية أثمرت في آخر السورة و جابت الحب و التعظيم.

**لماذا كلم موسى هارون قبل السامري ؟**

سيدنا موسى كلم الأول هارون و لا كلم السامري الأول ؟ من اللي كلمه الأول ؟ هارون هو اللي كلمه الأول ، يعني لو رسول الله صلى الله عليه وسلم نزل دلوقتي ، و شاف الفساد اللي برة ده ، هيروح يكلمنا الأول و لا يكلم الناس اللي فاسدة برة ؟ هيكلمنا احنا الأول ، أنتم سكتوا ليه ؟ أنتم إيه اللي خلاكم تسكتوا ؟ يوم القيامة ربنا هيكلم مين ؟ هيكلم الدعاة و هيكلم الملتزمين الأول ، انتم إزاي تشوفوا الناس ضايعة و تسكتوا ؟ قبل ما يكلم أهل الضلال هيكلم أهل الحق ، أنتم إزاي تسكتوا ؟ دي مسؤوليتنا يا جماعة ، المقصد أن ده بيوصلنا فكرة أن أنت المسؤول ، وأنت السبب الأول ، قبل حرب أهل الباطل ، **تخاذل أهل الحق هو السبب الأول لانتشار الباطل و فساد الناس.**

**الوحدة خط أحمر**

بعد كدة شوفوا الكلمة الخطيرة ، سيدنا هارون يقول لسيدنا موسى إيه ؟ بيفسر له هو ليه ما عملش حاجة **"إِنِّي خَشِيتُ أَنْ تَقُولَ فَرَّقْتَ بَيْنَ بَنِي إِسْرَائِيلَ"** طه: ٩٤ يا اياه ، شوفوا خطورة الوحدة ، شوفوا خطورة إن احنا نبقي صف واحد ، بيقوله أنا عارف أن أنت يا موسى أخطر حاجة عندك أن الصف يبقى واحد ، فأنا خفت ، ما دام المشكلة ينفع تتحل و احنا لسه صف واحد ، ما نفرقش أبداً يا جماعة ، التفريق اللي ما بين الملتزمين دلوقتي ! التفريق ما بين الجماعات دلوقتي ! التفريق اللي ما بين أهل الدين دلوقتي ! ما ينفعش ، يا جماعة الوحدة دي "تراك" ، لو أنت خرجت عنه و أنت بتعمل لدين الله ، يبقى أنت خرجت عن مقصود الله ، الوحدة دي خط أحمر أوعى تعديه ، شوف أي واحد بيشتغل لدين الله ، لو لقيته بيهدم ، أو لو لقيته بيفرق ، أو لو لقيته هو في ناحية و الباقي في ناحية ، اعرف على طول أن مش هو ده الحق الكامل ، الحق الكامل من أهم شروطه أن خط الوحدة ما يتكسرش ، أبداً ، ما دام ينفع نصلح الأخطاء اللي فينا و احنا أيد واحدة ، ما نتفرقش أبداً ، واخدين بالكم من المعنى يا جماعة ، يعني الآيات مليانة إيمانيات ، حب و تعظيم ، و مليانة فهم لخطورة الوحدة و المسؤولية اللي علينا ، و مليانة جهد **"قَالُوا لَنْ نَبْرَحَ عَلَيْهِ عَاكِفِينَ"** طه: ٩١ شايفين أهل الباطل عاكفين على نصره الباطل إزاي ، و عاكفين على عبادة الباطل إزاي ، يبقى لازم لهم واحد ببذل مجهود أعلى منهم زي سيدنا موسى ، يبقى الشوط الاخراني ده كأن ربنا بيقولك أنك لازم ثمرة التربية علو القلب و التعظيم ، علو الفهم المفاهيم اللي قلناها ، علو الجهد زي ما هم عاكفين على الباطل احنا كمان نعكف على الحق ياذن الله سبحانه و تعالى.

**آيات الآخرة**

بعد الشوط بتاع تربية موسى النموذج ، آيات الآخرة **"وَيَسْأَلُونَكَ عَنِ الْجِبَالِ فَقُلْ يَنْسِفُهَا رَبِّي نَسْفًا \* فَيَذَرُهَا قَاعًا صَفْصَفًا \* لَا تَرَى فِيهَا عِوَجًا وَلَا أَمْتًا"** طه ١٠٥ : ١٠٧ إيه ده ؟ ربنا أول حاجة بدأها السورة إيه ؟ الكلام عن مين ؟ عن الله ، أول حاجة

قبل ما يقول قصة موسى ، و بعد ما قال قصة موسى تكلم عن مين ؟ الآخرة ، كأن ربنا جايلك النموذج بتاع موسى ما بين الله و الآخرة ، كأن ربنا بيقولك على أد ما تتربى على معاني الله و الدار الآخرة ، على أد ما تقترب من هذا النموذج

ثم يقول لرسول الله " **لَا تُحَرِّكْ بِهِ لِسَانَكَ لِتَعْجَلَ بِهِ** " القيامة: ١٦ لا تستعجل ، اتبني أنت الأول ، اصلح أنت الأول " **أَلَمْ تَرَ إِلَى الَّذِينَ قِيلَ لَهُمْ كُفُّوا أَيْدِيَكُمْ وَأَقِيمُوا الصَّلَاةَ وَآتُوا الزَّكَاةَ** " النساء: ٧٧ اتربي ، دي فترة التربية ، عشان فترة المسؤولية هتيجي بعد كدة ، شوفوا " **قَدْ أَفْلَحَ مَنْ تَزَكَّى \* وَذَكَرَ اسْمَ رَبِّهِ فَصَلَّى** " الاعلى ١٤ : ١٥ احنا عاوزين نوصل للمقام ده يا جماعة ، إن اسم الله أول ما يجي قدامك ، قلبك يرتجف و الحب يتفجر و التعظيم يتفجر ، تقوم تجري على طول توقف ساعتين تصلي بين أيدي ربنا ، عاوزين يا جماعة التزكية توصل بنا لهذه الدرجة ، عاوزين نصلح قلوبنا يا جماعة ، عاوزين التربية القلبية.

نموذج سيدنا آدم

ثم بعد النموذج ده ، النموذج الثاني " **وَلَقَدْ عَاهَدْنَا إِلَى آدَمَ مِنْ قَبْلِ فَتَسِيٍّ وَلَمْ نَجِدْ لَهُ عَزْمًا** " طه: ١١٥ النموذج الأول اللي صبر على التربية ، و اللي صبر على أمر الله ، و هو سيدنا موسى ، و النموذج الثاني سيدنا آدم اللي هو " **تَسِيٍّ وَلَمْ نَجِدْ لَهُ عَزْمًا** " كأن ربنا بيقول للنبي صلى الله عليه وسلم قدامك النموذجين ، هتتبع ده و لا هتتبع ده ، هتصبر و لا هتتسى و لا أجد لك عزمًا ؟ و هنا ينتهي الشوط الأول و هو شوط تربية المؤمنين ، و يبدأ الشوط الثاني في السورة.

ماذا نقول للناس في الدعوة

" **وَإِذْ قُلْنَا لِلْمَلَائِكَةِ اسْجُدُوا لِآدَمَ** " طه: ١١٦ الشوط الثاني اللي هو دعوة المشركين ، كأن بعد ما تربيت خلاص بقيت تمام ، اخرج للدعوة بقى ، يلا اخرجوا للدعوة يا صحابة بقى.

شوط دعوة المشركين المحاور بتاعته إيه يا جماعة ؟ أول حاجة ربنا بيقول " **فَلَا يُخْرِجَنَّكُمَا مِنَ الْجَنَّةِ فَتَشْقَى** "

طه: ١١٧ إيه اللي نقولوا للناس يا رب؟ ربنا بيعلمنا أهو اتعلم من القرآن تقول للناس إيه ، أول حاجة تروح للناس تقولهم كدة ، تقولهم أن ربنا قسم الدنيا في القرآن حنتين ، جنة و دنيا ، الجنة هي السعادة ، و الدنيا هي الشقاء ، أي مكان برة الجنة شقاء ، لازم نفهم الناس الموضوع ده يا جماعة ، أي مكان برة الجنة شقاء ، القهوة شقاء و النادي شقاء و المصايف شقاء ، كل حاجة شقاء ، ما فيش مكان فيه سعادة غير الجنة.

" **وَمَنْ أَعْرَضَ عَن ذِكْرِي فَإِنَّ لَهُ مَعِيشَةً ضَنْكًا** " طه: ١٢٤ فهموهم إن الدنيا من غير ربنا معيشة ضنك ، هم و اكتاب و غم و حزن و ضيق و خنقة ، فهموهم إن الدنيا هتبقى خنقة من غير ربنا سبحانه و تعالى ، فهموهم إن مفيش سعادة غير في الجنة ، فهموهم إن هيحشروا عمي يوم القيامة " **وَمَنْ أَعْرَضَ عَن ذِكْرِي فَإِنَّ لَهُ مَعِيشَةً ضَنْكًا** و **وَنَحْشُرُهُ يَوْمَ الْقِيَامَةِ أَعْمَى** " طه: ١٢٤ يعني الدنيا هتضيع و الآخرة هتضيع لو فضلت تعصي ربنا

" **قَالَ رَبِّ لِمَ حَشَرْتَنِي أَعْمَى وَقَدْ كُنْتُ بَصِيرًا \* قَالَ كَذَلِكَ أَتَتْكَ آيَاتُنَا فَنَسِيتَهَا وَكَذَلِكَ الْيَوْمَ تُنْسَى \* وَكَذَلِكَ**

**نَجْزِي مَنْ أَسْرَفَ** " طه: ١٢٥ : ١٢٧ ربنا بيقولهم " **أَفَلَمْ يَهْدِ لَهُمْ كَمْ أَهْلَكْنَا قَبْلَهُمْ مِنَ الْقُرُونِ** " طه: ١٢٨ الأثر

الديوي و الدنيا كمان هتهلك ، واخدين بالكم نكلم الناس في إيه يا جماعة ، نقولهم الدنيا هتضيع و ما فيش سعادة



غير في الجنة ، و الجنة هتضيع اللي ما فيش السعادة غير فيها ، و الآخرة هتضيع و هتتحشروا عمي ، و العقوبات الدنيوية هتتزل عليكم من الله ، ده غير الحنقة اللي في قلوبكم ، لازم نكلم الناس كدة ، ليه ؟ عشان الناس فعلاً تخاف من المعصية اللي بتعملها.

### لا تنسَ العبادة و أنت تدعو

ثم في وسط شوط الدعوة كأن ربنا يقول للنبي صلى الله عليه وسلم إياك بعد ما خلصت تربية يتهيأ لك و أنت خارج للدعوة إن ماعدش في وقت عبادة ... لا ... ده أنت لازم وسط الدعوة تستمر في العبادة ، عشان الإيمانيات تتجدد في قلبك باستمرار. "فَاصْبِرْ عَلَىٰ مَا يَقُولُونَ وَسَبِّحْ بِحَمْدِ رَبِّكَ قَبْلَ طُلُوعِ الشَّمْسِ وَقَبْلَ غُرُوبِهَا وَمِنْ آنَاءِ اللَّيْلِ فَسَبِّحْ وَأَطْرَافَ النَّهَارِ لَعَلَّكَ تَرْضَىٰ" طه: ١٣٠ جلسة الضحي و جلسة تسبيح الآصال ، كل ده

تسبيح

"وَلَا تَمُدَّنَّ عَيْنَيْكَ إِلَىٰ مَا مَتَّعْنَا بِهِ أَزْوَاجًا مِنْهُمْ زَهْرَةَ الْحَيَاةِ الدُّنْيَا" طه: ١٣١ اوعى تبص للدنيا ، خلي كل همك أنك تتربي ، خلي كل همك إن بنيان الدين يتناول في قلبك ، مش بنيان الدنيا يتناول في إيدك ، بنيان الدين اللي يتناول ، و خلي بالك "وَأْمُرْ أَهْلَكَ بِالصَّلَاةِ وَاصْطَبِرْ عَلَيْهَا" طه: ١٣٢ مراتك ، زوجة الداعية ، مراتك اللي أنت هتزوجها دي ممكن تتزل الأرض و ممكن تساعدك في الدعوة ، وراء كل داعية امرأة يا جماعة ، امرأة مضحية ومثابرة و مصابرة ، اختار زوجتك كويس جدا ، عشان فعلاً تقدر توقف وراك في الدعوة إلى الله سبحانه و تعالى.

"وَأْمُرْ أَهْلَكَ بِالصَّلَاةِ وَاصْطَبِرْ عَلَيْهَا لَا نَسْأَلُكَ رِزْقًا نَحْنُ نَرْزُقُكَ وَالْعَاقِبَةُ لِلتَّقْوَىٰ" طه: ١٣٢ كأن ربنا يقول لا تفكر إن بقول لك اهتم بالتربية و ما تبصش للدنيا ، ده أنت أكثر واحد هتأخذ الدنيا في العالم ده كله ، ده أنت أكثر واحد هحط الدنيا في أيده في العالم ده كله ، بس بعد ما تثبلي أن قلبك مش معاها ، عشان لما أديها لك تبقى في إيدك مش في قلبك

ثم تختم السورة "قُلْ كُلُّ مُتَرَبِّصٍ فَتَرَبِّصُوا" استنوا التهديد بتاعهم "قُلْ كُلُّ مُتَرَبِّصٍ فَتَرَبِّصُوا فَسَتَعْلَمُونَ مَنْ أَصْحَابُ الصِّرَاطِ السَّوِيِّ وَمَنِ اهْتَدَىٰ" طه: ١٣٥ الكلمة دي كلمة فيها تسفيه لهم ، إزاي ؟ هتعرفوا مين كان على الصراط السوي و مين مهتدي ، وحتى لو قلتم إن مش احنا فيقيناً مش أنتم ، يعني استنوا العذاب ، ثم الكلمة كمان فيها تسفيه لهم ، يعني بتقلهم إيه ؟ أنا على الحق و لا مش على الحق ، أنتم يقيناً لا أنتم أصحاب الصراط السوي و لا أنتم من اهتدى ، و تنتهي سورة طه يا جماعة ، سورة التربية ، السورة اللي بتقلك أنت الأول ، و اهتم بنفسك الأول ، واللي وضحت مراحل التربية الثلاثة ، عشان لو عاوز تربي نفسك ، واللي وضحت أن المرحلة الأولى في حياتك لازم تكون فترة تربية إيمانية.

### سورة مريم

نرجع بقى لسورة مريم ، أنا قلت سورة طه بالأول بس عشان الفكرة الخطيرة بتاعتها ، الوقت ما يعديش و تتسحب مننا ، سورة مريم الفكرة بتاعتها بسيطة ، و عاوزين يا جماعة وبساطة هتنبهر بها ، أنا فاكر أحد المفسرين قرأت له زمان في أحد الكتب ، يقول إن سورة مريم دي كل ما اسمعها زمان من أحد الشيوخ ، الشيخ محمد رفعت الله يرحمه ، يقول كنت أفتح عيني وأقعد منبهر ، إيه ده ؟ فأنا لما قرأت الكلام ده زمان ، قلت يا رب هو منبهر

ليه؟ إيه اللي فيها مبهر؟ أما الواحد بفضل الله بدأ يفهم آيات القرآن فهتمت إيه اللي فيها مبهر، سورة مريم يا جماعة كلها عطاءات ربانية مبهرة لأهل الإيمان، كلها معجزات و كسر للأسباب، عشان أهل الإيمان يتقوا في قدرة الله سبحانه و تعالى

**ليه مريم بعد الكهف؟**

سورة مريم جت بعد سورة الكهف ليه؟

١. سورة الكهف كلها حركة، لكن سورة مريم كلها محاريب و كلها عبادة، واحة تستريح فيها بعد الكهف  
٢. و كمان في رابط ثاني: سورة الكهف كلها عطاءات ربانية، و سورة مريم كلها عطاءات ربانية، سورة الكهف العطاءات الربانية اللي أعطاهها لأهل الكهف في الكهف **"وَتَرَى الشَّمْسَ إِذَا طَلَعَتْ تَزَاوَرُ عَنْ كَهْفِهِمْ ذَاتَ الْيَمِينِ وَإِذَا غَرَبَتْ تَقْرِضُهُمْ ذَاتَ الشَّمَالِ"** الكهف: ١٧ و العطاءات اللي أعطاهها للخضر **"عَلَّمْنَاهُ مِنْ لَدُنَّا عِلْمًا"** الكهف: ٦٥ و العطاءات اللي أعطاهها لذي القرنين **"وَأَتَيْنَاهُ مِنْ كُلِّ شَيْءٍ سَبَبًا"** الكهف: ٨٤ كلها عطاءات ربانية و سورة مريم كمان كلها عطاءات ربانية، سيدنا زكريا بعد ما كبر ياخذ ولد، و السيدة مريم تولد ولد من غير زوج، و سيدنا إبراهيم بعد ما كبر ياخذ اثنين من الأنبياء، و كمان ذريتهم أنبياء، و سيدنا موسى ربنا يكلمه، و سيدنا إدريس ربنا يرفعه مكاناً علياً، إيه ده يا رب؟ إيه العطاءات دي؟ طوفان من العطاءات الربانية سورة مريم دي طوفان، بتحسسك إن في كنوز قاعدة تتزل، طب أنا نصيبي إيه؟ أنا عاوز شوية من الكنوز دي، آخذها إزاي؟

سورة طه اللي بتيجي بعدها عشان تقلك تأخذها إزاي، لو مشيت في الطريق بتاع سورة طه، هتوصل في الآخر للمقام اللي يتزل عليك فيه فتوحات سورة مريم، كأن ربنا يعلم إنك بعد ما تسمع سورة مريم، هتقول إيه ده يا رب؟ الأنبياء دول أنا ما قدرش أوصل للمقامات دي؟ بعد ما انبهرت بها أنا مش هأقدر أوصلها؟ كأن ربنا يقولك لا... تقدر، لو مشيت في طريق طه، هتعرف أنك أنت توصل للمستوى اللي يتزل عليك عطاءات مريم يعني ربنا الأول يطعمك في الغاية، يوريك باب السماء اللي اتفتح لغيرك، كل ده بيحصل و بعد كدة يقفل الباب، عاوز توصل؟ آه، هتصبر؟ آه، هتستحمل؟ هأستحمل، خد طه عشان تعرفك توصل إزاي.

**إيه سبب تسمية سورة مريم؟**

سورة مريم اسمها سورة مريم ليه؟ ما فيها إبراهيم و فيها زكريا، و فيها عيسى و فيها يحيى، و مليانة رجالة أنبياء، اشعنى تتسمى باسم المرأة الوحيدة اللي فيها؟ كأن ربنا يقولك إن المرأة ممكن توصل زى الرجل بالضبط، و إن المرأة ممكن يخرج منها بطولات زى الرجالة بالضبط، طب ليه يا رب؟ عشان ربنا يعرف المرأة أنها ممكن توصل زيها زي الرجل

و في نفس الوقت عشان ربنا سبحانه و تعالى يعرفنا قصة مريم، قصة مريم دي فيها من الآيات في هذه السورة، يعني ربنا سبحانه و تعالى و هو بيكلم سيدنا زكريا قاله إيه؟ **"ذِكْرُ رَحْمَةِ رَبِّكَ عَبْدًا زَكِيًّا \* إِذْ نَادَى رَبَّهُ نِ دَهْءٍ خَفِيًّا \* قَالَ رَبِّ إِنِّي وَهَنَ الْعَظْمُ مِنِّي وَاشْتَعَلَ الرَّأْسُ شَيْبًا"** مريم: ٢: ٤ ما فيش أسباب خالص، قصة مريم مش كدة يا جماعة، قصة مريم ربنا في وسط المعجزات اللي عملها لها بيقلمها **"وَهَزِي إِلَيْكَ بِجَذَعِ النَّخْلَةِ"** مريم: ٢٥ الله أكبر،

ليه يا رب ؟ عشان كأن ربنا يقولك لا تفتكر و أنا أكلمك عن المعجزات وكسر الأسباب ، إن على طول هي ماشية كدة ، لا ، لو بإيدك سبب تقدر تأخذه لازم تأخذه ، يا رب ده لو ٢٠ راجل هزوا نخلة ، مش هتترل بلحة ، هي هتترل و هي لسه والدة ؟ بس تأخذ بالأسباب ، وربنا سبحانه و تعالى يريدنا تأخذ بالأسباب ، وأنه يضع الأخذ بالأسباب وسط سورة مريم عشان يعلمك إيه ؟ الموازنة ما بين الربانية و ما بين الأخذ بالأسباب ، ما بين الإثنين فسورة مريم يا جماعة ، سميت على اسم امرأة ، ليه ؟ لأن المرأة ، لما البطولات تصدر من الرجالة ماشي ، إنما تصدر من امرأة و يتحط اسمها عشان نعرف دور المرأة الخطير ، أو قدرة المرأة الخطيرة على الوصول إلى الله ، و السابق إلى الله سبحانه و تعالى

### موضوع سورة مريم

أول سورة مريم بردة "كهيعص" مريم: ١ حروف مقطعة ، ليه يا رب ؟ عشان الثقة ، يعني السور دي كلها بتقلك لازم يبقى عندك ثقة في الله سبحانه و تعالى .

سورة مريم يتكلم عن إيه يا جماعة ؟ موضوعها إيه ؟ أكثر سورة ذكر فيها اسم الله "الرحمن" في القرآن كله سورة مريم ، أكثر سورة ، واسم الله "الرحمن" هذا له معنيين ، معنى الرحمة اللي برحمته ، لو رحمك ، سيفرقك عطاءات ، و معنى العزة ، اللي بعزته ، لو غضب عليك ، سينكل عليك في الدنيا و الآخرة

فسورة مريم نصفين ، النصف الأولاني كله عن عطاءات الرحمن لأولياته ، والنصف الثاني كله عن عقوبات الرحمن لأعدائه ، كأن ربنا بيقلك حاسب من الله الرحمن "إن قلوب بني آدم كلها بين إصبعين من أصابع الرحمن" صححه الألباني أهو ، المؤشر بتاع قلبك أهو ، ممكن يجي الناحية دي على إذاعة القرآن الكريم ، و ممكن يجي الناحية دي على سوا سوا ، ممكن يخليك في الجامع ، و ممكن يخليك دلوقتي و العياذ بالله في أفجر حالات البشر ، يعني ربنا ممكن يرفعك السما و ممكن يترك الأرض ، يبقى اسم الله "الرحمن" يثير في قلب المؤمن رجاء رهيب في عطاءات الله ، و خوف رهيب من عقوبات الله سبحانه و تعالى .

### عطاءات الرحمن لأولياته

كل قصص العطاءات عبارة عن حاجتين ، جزء عطاءات و جزء بطولات .

### قصة سيدنا زكريا

"إِذْ نَادَى رَبَّهُ نِدَاءً خَفِيًّا" مريم: ٣ ليه "نداء خفياً" ؟ واحد عنده ١٠٠ سنة ولا ٩٠ سنة ، واقف بيقول يا رب ادبني ولد ، و مراتي يا رب ما بتخلفش و هي عندها ١٥ سنة ، و دلوقتي عندها ٧٠ أو ٨٠ سنة ، لو حد سمعه هيقول إيه ؟ عشان كدة الناس مبتفهمش اليقين ده "نداء خفياً" عشان ما حدش يقله حاجة

"قَالَ رَبِّ إِنِّي وَهَنَ الْعَظْمُ مِنِّي" مريم: ٤ يا رب أنا كبرت و ضعفت "وَاشْتَغَلَ الرَّأْسُ شَيْبًا وَلَمْ أَكُنْ بِدُعَائِكَ رَبِّ شَقِيًّا" مريم: ٤ عمري ربي ما رفعت لك يدي و شقيت مع دعائك أبدا يا رب ، عمري ما توجهت ليك بالدعاء و شقيت مع دعائك أبدا يا رب .

"وَإِنِّي خِفْتُ الْمَوَالِيَ مِنْ وَرَائِي" مريم: ٥ مين اللي هيشيل الدين من بعدي يا رب ؟ مين اللي هيشيل الدعوة من بعدي يا رب ؟ الأنبياء طلبوا الدنيا ليه يا جماعة ؟ ليه سيدنا سليمان طلب الملك ؟ عشان يسخره في الدعوة ، ليه

سيدنا محمد طلب المال ؟ عشان يسخره في الدعوة ، ليه سيدنا أيوب طلب الشفاء ؟ عشان الناس لما تشوف الداعية مريض و مبتلى ، ممكن تقول السكة دي سكة ابتلاءات ، عشان الناس ما تفتنش عن الدعوة ، ليه سيدنا زكريا طلب الولد ؟ عشان اللي يشيل الدعوة من بعده ، يعني كانوا عاوزين الدنيا عشان الدين ، كانوا عاوزين الدنيا عشان يسخروها في الآخرة.

"وَإِنِّي خِفْتُ الْمَوَالِيَ مِنْ وَرَائِي وَكَانَتِ امْرَأَتِي عَاقِرًا فَهَبْ لِي مِنْ لَدُنْكَ وَلِيًّا" مريم: ٥ شايف الأدب ؟ يا رب أنا عاوز هبة يا رب ، يارب أنا عايز حاجة أنا ما أدبتش ثمنها ، التسعين سنة عبادة اللي فاتوا دول مش ثمن حاجة ، و لكن أنا عاوز منك هبة أنك تديني "فَهَبْ لِي مِنْ لَدُنْكَ وَلِيًّا" مريم: ٥ أنا عاوز منك ابن "يُرِثْنِي وَيَرِثُ مِنْ آلِ يَعْقُوبَ" مريم: ٦ يشيل العلم من بعدي و يشيل الدعوة من بعدي "وَاجْعَلْهُ رَبِّ رَضِيًّا" مريم: ٦ اجعله من أهل الرضا يا رب

نفاعاً يا جماعة بعد ما سيدنا زكريا يخلص دعاءه "فَخَرَجَ عَلَى قَوْمِهِ مِنَ الْمِحْرَابِ" مريم: ١١ يعني كل ده كان في المحراب ، العبادة ، سيدنا زكريا في المحراب و السيدة مريم في المحراب ، سورة مريم بتقلك لازم تبقى من أهل المحارب ، لازم تبقى من أهل العبادة ، لازم العشر أيام الجالين بتنوع الاعتكاف توصل الليل بالنهار عبادة فيهم ، لازم من أهل العبادة لله سبحانه و تعالى ، عشان كدة كلها في المحراب "فَأَوْحَى إِلَيْهِمْ أَنْ سَبِّحُوا بُكْرَةً وَعَشِيًّا" مريم: ١١ اقعدهم سبوح ربنا ليل نهار ، سبحه بالكور و سبحه بالعشي سبحانه و تعالى.

### قصة سيدنا يحيى

بعد كدة بتيجي قصة يحيى ، إيه البطولات و إيه الكرامات؟ البطولات "خُذِ الْكِتَابَ بِقُوَّةٍ" مريم: ١٢ مع سيدنا زكريا الكرامات عطاء الولد ، البطولات كل المقامات الإيمانية اللي احنا قلناها. مع سيدنا يحيى "خُذِ الْكِتَابَ بِقُوَّةٍ" خليك قوي في أخذ القرآن ، لما تسمع عن حاجة خذها بقوة ، لما تسمع عن أي حاجة في العبادة و لا التربية الإيمانية خذها بقوة ، يعني أنا هتربي هتربي ، هوصل يعني هوصل. ربنا أعطاهايه؟ "وَأَتَيْنَاهُ الْحُكْمَ صَبِيًّا . وَحَنَانًا مِّن لَّدُنَّا وَزَكَاةً وَكَانَ تَقِيًّا" مريم: ١٢ - ١٣ عطاءات ربنا.

### مشهد سيدنا عيسى عليه السلام

ثم قصة السيدة مريم ، اللي بتخلص في الآخر بمشهد سيدنا عيسى عليه السلام ، و هو طفل ، و هو لسه رضيع ينطق في المهدي و يقول "قَالَ إِنِّي عَبْدُ اللَّهِ" مريم: ٣٠ أول كلمة قالها عبد ، عشان اللي هيفتنوا به بعد كدة ، يبقى رد على الذين سيغلون به قبل أن يرد على الذين سيكذبونه "قَالَ إِنِّي عَبْدُ اللَّهِ آتَانِيَ الْكِتَابَ" مريم: ٣٠ عبد الله عشان اللي غلوا فيه النصرى ، و آتاني الكتاب عشان اللي كذبوا به اليهود ، رد على اللي غلوا فيه قبل اللي كذبوا به ، الغلو أخطر في الدين ، التشدد أخطر في الدين من التسبب يا جماعة ، الإنسان المتشدد اللي دماغه مقفولة أخطر على الدين من التسبب - خدوا بالكم - عشان كدة رد على دول قبل دول.

كن مباركاً أينما كنت

"وَجَعَلْنِي مُبَارَكًا أَيْنَ مَا كُنْتُ" مريم: ٣١ هو ده المقام اللي احنا عايزين نخرج به ، تبقى مبارك أينما كنت ، تبقى في رمضان إنسان مبارك ، ٥٠ واحد يدخلوا المسجد في رمضان على إيدك ، تبقى في الاعتكاف إنسان مبارك ، ٢٠

واحد من صحابك يأتون ليعتكمفوا معاك على إيدك ، تبقى بعد رمضان مبارك ، في الدعوة في الجامعة وسط أصحابك ، تبقى إنسان مبارك في كل مكان ، تركب الميكروباص اللي مشغل أغاني ، دقيقتين و يبقى مشغل القرآن ، تعدى على شلة بيعاكسوا بنات توقف معاهم خمس دقائق يدخلوا معك الجامع ، خليك مبارك أينما كنت ، خليك مبارك في دفعتك ، بعد ثلاث أربع سنين من الوجود فيها نصفها يلتزم على إيدك ، خليك مبارك في حتتك ، نص شباب الحطة يلتزموا على إيدك ، خليك مبارك في المسجد بتاع الحطة بتاعتك ، بعد ما كان صفين ، بعد سنتين ثلاثة من الدروس اللي بتديها فيه و الدعوة اللي أنت عاملها فيه ، يبقوا سبع ثمان صفوف على إيدك ، **خليك مبارك في كل مكان تروح فيه ، خليك شايل دعوة الله و شايل الإيمان بالله في كل مكان تروح فيه.**

### قصة سيدنا إبراهيم

بعد كدة يا جماعة قصة سيدنا إبراهيم ، اللي بتبين بطولة سيدنا إبراهيم في الدعوة ، و صبره على أبيه ، ماتقلش ما فيش وقت ، أبويا إيه ؟ أنا مش فاضي ، أنا وراي أدعو أصحابي ، و وراي أن أنا أطلب علم و لا أطلب إيمان ، يا جماعة لازم ناخذ بالناس من الحطة دي كويس جدا ، أوعى تستخسر وقت في دعوة أبوك وأمك ، أوعى تستخسر وقت في بر الوالدين ، أوعى ، سيدنا إبراهيم نصف صفحة كاملة قاعد يدعوا أبوه و أمه. وفي الآخر بيقول إيه ؟ **"عَسَىٰ أَلَّا أَكُونَ بِدُعَاءِ رَبِّي شَقِيًّا"** مريم: ٤٨ عكس الكلمة اللي قالها سيدنا زكريا في أول السورة ، يعني إيه ؟ يعني لو ما اشتغلتش في الدعوة ، وأعلنت تبرؤك من المعاصي اللي ترتكب على الأرض بأنك تشتغل في الدعوة ، ممكن ربنا يجرمك من إجابة الدعاء ، عرفتم ليه الأمة دلوقتي محرومة من إجابة الدعاء ؟ لأن الأمة ما عدتش شغالة في الدعوة يا جماعة ، **ولو عاوز يستجاب دعائك لازم تشتغل في الدعوة إلى الله.** إيه العطاءات يا رب قصاد البطولات دي ؟ **"وَهَبْنَا لَهُ إِسْحَاقَ وَيَعْقُوبَ وَكُلًّا جَعَلْنَا نَبِيًّا"** مريم: ٤٩ الوهب اللي ربنا وهبه له.

### بطولات و عطاءات الأنبياء في آية واحدة

قصص الأنبياء دي كلها ربنا سبحانه و تعالى جمعها في الآخر في آية واحدة ، جمع كل البطولات و كل العطاءات في كلمة أو في آية واحدة جمعت الاثنين **"أُولَئِكَ الَّذِينَ أَنْعَمَ اللَّهُ عَلَيْهِمْ مِنَ النَّبِيِّينَ مِنْ ذُرِّيَةِ آدَمَ وَمِمَّنْ حَمَلْنَا مَعَ نُوحٍ وَمِنْ ذُرِّيَةِ إِبْرَاهِيمَ وَإِسْرَائِيلَ"** مريم: ٥٨ الإنعام أهو ، العطاءات أهو ، أدبتهم العطاءات دي كلها ليه ، ربنا قبل ما يختم شوط العطاءات عشان يعرفك السكة ، أعطاك كلمة واحدة بس لما حققها أعطاهم العطاءات دي كلها **"إِذَا تُتْلَىٰ عَلَيْهِمْ آيَاتُ الرَّحْمَنِ"** مريم: ٥٨ لما القرآن يزل على قلبك **"إِذَا تُتْلَىٰ عَلَيْهِمْ آيَاتُ الرَّحْمَنِ خَرُّوا سُجَّدًا وَبُكِيًّا"** مريم: ٥٨

### تربية القلب هي سر الفتوح

رقة القلب ، تربية القلب ، صلاح القلب ، العبادة والإيمانيات هي دي سر الفتوح ، لما تتربي في المحراب صح ، تتلمى إيمانيات و عبادة ، تسمع آيات القرآن الدموع تسيل من عينيك ، أبشر أن ربنا هيتزل عليك عطاءات لا حصر لها ، و أبشر أن ربنا هيستعملك في دينه استعمال لم تكن تتوقعه ، يا جماعة الاستعمال على أد الإيمان ، يا جماعة الإصطفاء على أد الإيمان مش بالمواهب ، ممكن واحد قاعد معنا دلوقتي لسانه ٥٠ متر ، لو تكلم عن ربنا يخلي الناس كلها تدخل الجامع ، وربنا ما يستعملوش لأنه قلبه مش نضيف ، و ممكن واحد قاعد معنا دلوقتي بسيط

وربنا يخلية بكرة داعية يطلع المنابر ، ليه ؟ عشان قلبه مع الله سبحانه و تعالى ، الإستعمال على أد الإيمان ، و على قد ما هتتربي إيمانياً على قد ما ربنا سبحانه و تعالى هتستعملك .

تنكيل الله بأعدائه

النصف الثاني من السورة كله تنكيل الله بأعدائه "فَخَلَفَ مِنْ بَعْدِهِمْ خَلْفٌ أَضَاعُوا الصَّلَاةَ وَاتَّبَعُوا الشَّهْوَاتِ" مريم:

٥٩ لما عملوا كدة ربنا قال "فَسَوْفَ يَلْقَوْنَ غِيًّا" مريم: ٥٩ وادي في جهنم سيشون فيه

بعد كدة "وَيَقُولُ الْإِنْسَانُ أِنْدَا مَا مِتُّ لَسَوْفَ أُخْرَجُ حَيًّا" مريم: ٦٦ أهو ، حاجات بتغضب الله "أَوَلَا يَذْكُرُ الْإِنْسَانُ

أَنَّا خَلَقْنَاهُ مِنْ قَبْلُ وَكَمْ يَكُ شَيْئًا . فَوَرَّبُّكَ لَنَحْشُرُهُمْ وَالشَّيَاطِينَ" مريم: ٦٧ : ٦٨ كل المجرمين ، مجرمين الأنس و

مجرمين الجن "لَنَحْشُرُهُمْ وَالشَّيَاطِينَ ثُمَّ لَنُحْضِرَهُمْ حَوْلَ جَهَنَّمَ جِثِيًّا" مريم: ٦٨ قاعدين على ركبهم في الذل و

الوصب و السلاسل و الأغلال. "ثُمَّ لَنَنْزِعَنَّ" التزع ده معناه أنه بيقاوم و بيمسك في الأرض ، و بيمسك في الناس

، ولكن بيتزع "ثُمَّ لَنَنْزِعَنَّ مِنْ كُلِّ شِيعَةٍ أَيُّهُمْ أَشَدُّ عَلَى الرَّحْمَنِ عِتِيًّا" مريم: ٦٩ أشد واحد كان يتكبر علي يترمي

في النار الأول

"ثُمَّ لَنَحْنُ أَعْلَمُ بِالَّذِينَ هُمْ أَوْلَىٰ بِهَا صِلِيًّا" مريم: ٧٠ واحد واحد بعد كدة "وَإِن مِّنكُمْ إِلَّا وَارِدُهَا" مريم: ٧١

اعمل حساب اللحظة دي ، لحظة ما هتعتدي من على الصراط "كَانَ عَلَىٰ رَبِّكَ حَتْمًا مَّقْضِيًّا \* ثُمَّ نُنَجِّي الَّذِينَ اتَّقَوْا

وَنَذِرُ الظَّالِمِينَ فِيهَا جِثِيًّا" مريم: ٧١ : ٧٢ يعني إيه "جِثِيًّا" ؟ يعني حتى و هو في النار جاثي و قاعد يتوسل ، يا رب

انجدي يا رب ، يا رب خرجني ، قاعد ينادي في ربنا و ينادي في الملائكة و ينادي في الكبراء ، و ينادي في أي حد

يخرجه ، و ينادي في المؤمنين يدوله شربة ماء ، و يظل جثياً و العياذ بالله في جهنم

يبقى شايف كأن ربنا بيقول لك شوف أنا لما أنتقم أعمل إيه ، و شوف أنا لما أغضب أعمل إيه "أَفَرَأَيْتَ الَّذِي كَفَرَ

بِآيَاتِنَا وَقَالَ لَأُوتِيَنَّ مَالًا وَوَلَدًا" مريم: ٧٧ بعد ما أغضبنا عاوز كمان دنيا "أَطَّلَعَ الْغَيْبَ أَمِ اتَّخَذَ عِنْدَ الرَّحْمَنِ

عَهْدًا" مريم: ٧٨ كلا هذا لا يكون أبدا "كَلَّا سَنَكْتُبُ مَا يَقُولُ وَنَمُدُّ لَهُ مِنَ الْعَذَابِ مَدًّا" مريم: ٧٩ في الدنيا قبل

الآخرة "وَوَرَّثَهُ مَا يَقُولُ وَوَيَاتِينَا فَرْدًا" مريم: ٨٠ ربنا سبحانه و تعالى يعدد الجرائم اللي أهل الباطل انتهكوا حرمت

الله فيها

و اللي النصرارى لما قالوا "وَقَالُوا اتَّخَذَ الرَّحْمَنُ وَلَدًا \* لَقَدْ جِئْتُمْ شَيْئًا إِدًّا \* تَكَادُ السَّمَاوَاتُ يَتَفَطَّرْنَ مِنْهُ وَتَنْشَقُّ

الْأَرْضُ وَتَخِرُّ الْجِبَالُ هَدًّا \* أَنْ دَعَوْا لِلرَّحْمَنِ وَلَدًا \* وَمَا يَنْبَغِي لِلرَّحْمَنِ أَنْ يَتَّخِذَ وَلَدًا \* إِنْ كُلُّ مَنْ فِي السَّمَاوَاتِ

وَالْأَرْضِ إِلَّا آتَى الرَّحْمَنِ عَبْدًا \* لَقَدْ أَحْصَاهُمْ وَعَدَّهُمْ عَدًّا \* وَكُلُّهُمْ آتِيهِ يَوْمَ الْقِيَامَةِ فَرْدًا" مريم: ٨٨ : ٩٥

عودة إلى عطاءات الله لأوليائه

الشوط الثاني كله غضب الله على أعدائه ، و الشوط الأول كله عطاءات الله لأوليائه ، ثم نرجع ثانية لعطاءات الله

لأوليائه ، عشان ربنا يكون بدأ السورة و ختمها بعطاءات الأولياء "إِنَّ الَّذِينَ آمَنُوا وَعَمِلُوا الصَّالِحَاتِ سَيَجْعَلُ لَهُمُ

الرَّحْمَنُ وَدًّا" مريم: ٩٦ ربنا وعدك بالود

## اطمع في خزائن فتوحات الله

أنا عاوز يا جماعة الحديث اللي يخرج في قلوبنا ، و احنا خارجين من سورة مريم ، لما الرسول صلى الله عليه و سلم أيقظ زوجاته في جوف الليل وقاهم إيه ؟ **"ماذا أنزل الله من الخزائن" صحيح** كل ليلة خزائن الفتوحات يتنزل منها فتوحات يا جماعة ، الله أعلم الليلة ربنا هيفتح على مين أنه يصطفيه للدعوة ، و الله أعلم الليلة ربنا هيفتح على قلب مين باليقين ، و الله أعلم ربنا هيفتح على مين الليلة بالتوبة ، و الله أعلم ربنا هيفتح على مين الليلة بالالتزام ، ماذا فُتِحَ الليلة من الخزائن ؟ يا جماعة مش عايزين الليلة ؟ كل ليلة الخزائن تنفتح و تنزل الفتوحات ، و احنا كل ليلة نخرج من غير حاجة ، مش عاوزين يا جماعة ؟ سنين طول عمرنا كل ليلة الفتوحات تنزل ، و احنا ماناش حظ فيها ، عاوزين يبقى لنا نصيب في العطاءات دي ، خليك عندك طموح في عطاءات الله سبحانه و تعالى. طيب أوصل إزاي يا رب ؟ ده الناس دي عالية أوي اللي خدت العطاءات يا رب ؟ ده مقام **"خَرُّوا سُجَّدًا وَبُكِيًّا"** مريم: ٥٨ ده عالي أوي يا رب ، ده مقامات عالية أوي ، عايز توصل للمقامات دي ، و توصل للعطاءات دي؟ ادخل سورة طه ، و امش في الطريق بتاع سورة طه. اللي نركز على أول محطة فيه النهارده يا جماعة اللي هي محطة التربية الإيمانية و معاملة الله ، و مش هنمشي النهارده بإذن الله غير لما نقول آخر كلمة و هي كيف نصل إلى الله ، استخلاصاً من سورة طه.

## كيف نصل إلى الله ؟

عشان نوصل للمقامات بتاعت سورة مريم ، كيف نصل إلى الله ؟

١. **قوة العبادة** : العبادة دي بتخلي قلبك حساس جدا ، أقل كلمة عن ربنا تنبت مقامات الإيمان في قوة العبادة ، لما ربنا قال لسيدنا موسى **"وَأَقِمِ الصَّلَاةَ لِذِكْرِي"** طه: ١٤ و لما قال لسيدنا محمد **"وَسَبِّحْ بِحَمْدِ رَبِّكَ قَبْلَ طُلُوعِ الشَّمْسِ وَقَبْلَ غُرُوبِهَا"** طه: ١٣٠ و لما سيدنا موسى قال **"كَيْ نُسَبِّحَكَ كَثِيرًا \* وَنَذْكُرَكَ كَثِيرًا"** طه: ٣٣ : ٣٤ و لما قال لسيدنا موسى **"لَا تَنِيَا فِي ذِكْرِي"** طه: ٤٢ قوة العبادة.

٢. **استشعار وتذاكر نعم الله باستمرار** : ورقة النعم دي لازم تتعمل ... لازم ، و خلي من ورقة النعم إنك انت تعرف تقرا الرسائل الربانية ، لازم يبقى عندك فقه في قراءة الرسائل الربانية ، شوف ربنا عمل لك إيه طول حياتك ، و حط ترتيب الله لك في النعم و حط دخولك الجامع اليوم من ضمن النعم.

٣. **بعد العبادة و بعد النعم معاملة الله** : أخطر طريق توصل منه لربنا ، سيدنا موسى عامل ربنا ، مسك العصاية و هي لسه تعبان ، و هو واثق أن ربنا سيرجعها عصاية مرة ثانية ، لازم نعامل ربنا عشان الثقة تجي بالله نعامل ربنا إزاي؟ لما هتمشي في طريق العبادة ، و هتمشي في طريق الدعوة ، هتشوف آيات و تشوف كرامات و تشوف رؤى ، أجي بعد كدة أقولك إيه الدليل على وجود الله ؟ تقولي وجود الله ، امش يا جاهل ، وجود الله إيه ؟ إمال مين اللي عملي كل ده ؟ و مين اللي ورائي الرؤى دي ؟ و مين اللي رتب لي حياتي ؟ و مين اللي حل لي مشاكلي ؟ أنت جاي تقولي إيه الدليل على وجود الله ؟ إيه الدليل على وجودك أنت ، ده أنتم كلكم سراب و وهم ، و الحقيقة العظمى في هذا الكون هي الله ، تبقى فعلاً ماسك حاجة في إيدك

سيدنا موسى وصل بالمعاملة لمقام **"كَلَّا إِنَّ مَعِيَ رَبِّي سَيَهْدِينِ"** الشعراء: ٦٢ يبقى الحاجة الثالثة معاملة ربنا اللي بتيجي بأنك تمشي في طريق الله سبحانه و تعالى.

٤. أنت الأول ، ألا تؤثر أحدا بحظك من الله : لما ربنا أوحى لسيدنا محمد صلى الله عليه وسلم نزل القرآن على قلبك الأول ، و لما أوحى لموسى بالصلاة قبل أي حد ، يبقى إذا يا جماعة ألا تؤثر أحدا بحظك من الله ، إن يبقى الأولوية في حياتك للتربية القلبية ، الأولوية لإصلاح القلب ، هو ده الطريق الرابع للوصول إلى الله.

٥. المجاهدة والعزيمة : **"فَنَسِيْ وَكَمْ نَجِدْ لَهُ عَزْمًا"** طه: ١١٥ ده لأ ، كدة مش هتوصل ، لو فضلت توقع كثير مش هتوصل ، لازم يبقى عندك مجاهدة ، و لازم يبقى عندك عزيمة ، زي مجاهدة سيدنا موسى طول السورة ، و متبقاش من النموذج الثاني المذكور في السورة اللي هو **"فَنَسِيْ وَكَمْ نَجِدْ لَهُ عَزْمًا"** طه: ١١٥ يبقى المجاهدة و العزيمة.

٦. دراسة الأسماء والصفات : فين نلاقي الكلام ده ؟ في أول السورة ، لما ربنا بدأ أول السورة بشوط من الكلام عن الله سبحانه و تعالى ، أنك تعرف إن ربنا كبير يبقى الطريق اللي بعد كدة هو دراسة الأسماء و الصفات يبقى قوة العبادة ، تذكر نعم الله و قراءة الرسائل الربانية ، معاملة الله ، دراسة الأسماء و الصفات ، أن الأولوية تبقى في التربية القلبية و العبادة ، و بعد كدة قوة المجاهدة و قوة العزم ، و أنك أنت تمشي في الطريق ده بكل عزم في الطريق إلى الله.

**لا خيار لنا في معرفة الله**

عاوز أقولكم يا جماعة أن الوصول إلى معرفة الله حاجة لا خيار لنا فيها ، الوصول لمعرفة الله لو ما وصلتش لمعرفة الله ، أنت دلوقتي و أنت نازل تدعو هتخاف ، ما فيه تأثيرات من أهل الباطل ، لو أنت تعرف الله لن تخاف ، طب و أنت نازل تدعو إلى الله مشاق وطريق طويل ، لو أنت تعرف الله هتصبر **"وَلِرَبِّكَ فَاصْبِرْ"** المدثر: ٧ طب و أنت نازل تدعو إلى الله ما في تضحيات مطلوبة ، لو أنت تعرف الله هتتعرف أنت بتضحى عشان مين تضحى ، طب و أنت نازل تدعو إلى الله الناس يمكن لو سمعت كلمة و شافت النور على وجهك و أنت بتقوها هتتأثر بك و تيجي ، إنما لو الكلام ثقيل مش هيتأثر فيهم ، يبقى عشان الروحانية تيجي في وجهك و عينيك و في كلامك ، و تيجي في سمتك ، لو أنت تعرف الله النور و الروحانية هتيجي في وجهك يبقى إذا السورتين دول يا جماعة بيكلمونا عن معرفة الله ، سورة مريم بتكلمنا عن الربانية ، و سورة طه بتكلمنا عن التربية ، من أجل الوصول إلى هذه الربانية.

أقول قولي هذا و أستغفر الله لي و لكم. سبحانه اللهم و بحمدك ، أشهد ألا إله إلا أنت ، أستغفرك و أتوب إليك.  
تم بحمد الله

**شاهدوا الدرس للنشر على النت في قسم تفرغ الدروس تفضلوا هنا :**

<http://www.way2allah.com/forums/forumdisplay.php?s=d5fa851b936c6742ef5d2ac53524ee58&f=36>